

摘藻堂四庫全書薈要

經部

欽定四庫全書薈要

經部

左傳注疏卷二十三

詳校官原任侍講臣王燕緒



欽定四庫全書薈要卷一千一百三十八

經部

春秋左傳注疏卷二十二

起宣公五年
盡十一年

晉杜氏注 唐陸德明音義 孔穎達疏

經五年春公如齊

夏公至自齊

秋九月齊高固來逆叔姬注高固齊大夫不書女歸降

于諸侯疏

正義曰僖五年公孫茲如牟注云娶于牟也
卿非君命不越竟故奉公命聘于牟因自為

逆然則此高固亦是因來聘而自逆也經書公孫茲如
牟是以聘為文此高固以逆為文不言聘者此二者皆

以非君之命不得越竟請君行聘而因自逆妻本意為逆不為聘也從魯而出私娶輕而君命重故書聘不書逆自外而來則嫁女重而受聘輕故書逆不書聘內外之異文耳諸侯嫁女于大夫則使大夫為主而書于經者行禮為尊卑不敵故使大夫為主耳其女適他族以先公遺體許人必告於廟故書之耳嫁于諸侯者皆書其歸此不書歸者差降於諸侯也非齊夫人不得言歸于齊若言歸于齊高氏則下嫁於大夫非公之敵故不得書其歸也

叔孫得臣卒注無傳不書日公不與小斂音義

不與音預斂力

反驗

冬齊高固及子叔姬來注叔姬寧固反馬疏

正義曰傳言來反馬

也據高固為文耳嫌叔姬亦為反馬故辨之二者各有
所為而且相隨行耳女既遠人當稱夫族宋蕩伯姬是
其事也叔姬已遠高氏而猶言子叔姬者以其新歸於
夫反馬乃成為婦今始來反馬故以父母之辭言之

楚人伐鄭

傳五年春公如齊高固使齊侯止公請叔姬焉注留

公強成昏音義

強其丈反

○夏公至自齊書過也注公既

見止連昏於鄰國之臣厭尊毀列累其先君而於廟

行飲至之禮故書以示過音義

厭於涉反累劣偽反

疏

正義曰凡公行

還書至者往反無咎喜之而告廟也公如齊見止求
與高固為昏方始得歸當以耻而不告亦復告廟飲

至故依常書之以示過釋例曰凡反行飲至必以嘉會昭告祖禰有功則舍爵策勲無勲無勞告事而已若夫執止之辱厭尊毀列所以累其先君忝其社稷故當克躬罪己不以嘉禮自終宣公如齊既已見止連昏於鄰國之臣而行飲至之禮故傳曰書過也言書過者書之以示公過也 ○秋九月齊

高固來逆女自為也故書曰逆叔姬卿自逆也注適

諸侯稱女適大夫稱字所以別尊卑也此春秋新例故稱書曰而不言凡也不於莊二十七年發例者嫌

見逼而成昏因明之音義

自為于偽反別彼列反

疏

正義曰俱是外來逆

女適諸侯諸侯遣臣來逆則稱逆女紀裂繻來逆女是也適大夫大夫自來逆則稱所逆之字此高固來

逆叔姬是也二文不同所以別尊卑也傳言卿自逆者別其與君逆也莊二十七年莒慶來逆叔姬文與此同不於彼發例者嫌此高固見迫而成昏與常例或異故因此以明其不異也

○冬來反

馬也注禮送女留其送馬謙不敢自安三月廟見遣

使反馬高固遂與叔姬俱寧故經傳具見以示譏音

義

廟見賢遍反下

疏

正義曰禮送女適於夫氏留其所送之馬謙不敢自安於夫若

被出棄則將乘之以歸故留之也至三月廟見夫婦之情既固則夫家遣使反其所留之馬以示與之偕老不復歸也法當遣使不合親行高固因叔姬歸寧遂親自反馬與之俱來故經傳具見其事以示譏也儀禮昏禮者士之禮也其禮無反馬故何休據之作膏肓以難左氏言禮無反馬之法鄭玄答之曰冠義

云無大夫冠禮而有其昏禮則昏禮者天子諸侯大夫皆異也士昏禮云主人爵弁纁裳緇衣乘墨車從車二乘婦車亦如之此婦車出於夫家則士妻始嫁乘夫家之車也詩鵲巢云之子于歸百兩御之又曰之子于歸百兩將之將送也國君之禮夫人始嫁自乘其家之車也則天子諸侯嫁女留其乘車可知也高固大夫也來反馬則大夫亦留其車也禮雖散亡以詩之義論之大夫以上其嫁皆有留車反馬之禮留車妻之道也反馬壻之義也高固以秋九月來逆叔姬冬來反馬則婦人三月祭行乃反馬禮也是說禮有反馬之法唯高固不宜親行耳杜言三月廟見謂無舅姑者士昏禮婦至其夕成昏贊明贊見婦於舅姑若舅姑既沒則婦人三月乃奠菜鄭玄云奠菜者祭菜也又記曰婦入三月然後祭行鄭玄云謂助祭也曾子問篇端稱孔子曰三月而廟見稱來婦也擇日而祭於廟成婦之義也鄭玄云謂舅姑沒者也

是舅姑沒者以三月而祭因以三月為反馬之節舅姑存者亦當以三月反馬也士昏禮又稱若不親迎則婦入三月然後壻見於妻之父母此高固親迎則不須更見故譏其親反馬也案杜注經云叔姬寧固反馬傳唯舉反馬不言寧者以寧是常事唯反馬非禮故傳舉其非禮者○楚子伐鄭陳

及楚平晉荀林父救鄭伐陳注為明年晉衛侵陳傳經六年春晉趙盾衛孫免侵陳

夏四月

秋八月螽注無傳

冬十月

傳六年春晉衛侵陳陳即楚故也○夏定王使子服

求后于齊注子服周大夫○秋赤狄伐晉圍懷及邢

丘注邢丘今河內平臯縣晉侯欲伐之中行桓子曰

使疾其民注驕則數戰為民所疾音義數所角反以盈其

貫將可殪也注殪盡也貫猶習也音義貫古患反注同殪於計反

疏正義曰釋詁云貫習也殪死也言其死盡故以殪為盡盈其貫者杜以為盈滿其心使貫習來伐劉

炫云案尚書泰誓武王數紂之惡云商罪貫盈言紂之為惡如物在繩索之貫不得為習也今知不然者

以詩稱射則貫兮先儒亦以為習故杜用焉義得兩通劉直以尚書之文而規杜過恐非也周書

曰殪戎殷注周書康誥也義取周武王以兵伐殷盡

滅之疏

正義曰如杜所注戎訓為兵謂以兵伐殷而殪盡也殪字宜在下以周書本文故其字在

上

此類之謂也注為十五年晉滅狄傳音義

為于偽反下注

同

○冬召桓公逆王后于齊注召桓公王卿士事不

關魯故不書為成三年王甥舅張本音義

召上照反

○楚

人伐鄭取成而還注九年十一年傳所稱厲之役蓋

在此○鄭公子曼滿與王子伯廖語欲為卿注二子

鄭大夫音義

曼音萬廖力彫反

伯廖告人曰無德而貪其在

周易豐䷶注離下震上豐之離䷵注豐上六變

而為純離也周易論變故雖不筮必以變言其義豐

上六曰豐其屋蔀其家闕其戶聞其無人三歲不覿

凶義取無德而大其屋不過三歲必滅亡音義蔀步口反

又善口反闕又規反

疏正義曰豐卦震上離下震為

聞舌鳴反覿徒歷反

動離為明動而益明豐大之

義豐卦上六變而為純離之卦故為豐之離也杜以

筮得此卦爻變而為彼卦可言遇觀之否遇坤之比

耳此直口語不是揲著而亦言豐之離者周易論變

為義故雖不筮論易者必以變言其義故言豐之離

也杜又引豐上六至不覿凶皆周易之文也王弼以

為上六以陰處極而最在外不履於位深自幽隱絕

跡深藏者也。節者覆鄣之物也。豐大其屋，又鄣蔽其家。闇之甚也，以甚闇而處大屋，不能久享其利。其屋雖大，其室將空。故闔其戶而閉，然無人也。經三歲而不能顯見，則凶。伯廖引此者，義取無德而居，乃屋不

過三歲必滅亡

弗過之矣。注：不過三年間一歲。鄭人殺之音。

義

間間廁之

經七年春，衛侯使孫良夫來盟。疏

正義曰：文二年，晉人以公不朝，使陽處父

盟公，以耻之。書曰：「及晉處父盟。」去其族，以厭耻也。然則公與大夫對盟，則為耻。辱此良夫來盟，無貶責者。彼公親朝晉，晉侯不與公盟，故遣大夫敵公。是為耻辱。此不貶責者，其君不得親來，遣臣來與公盟，不對彼君，非為

耻也

夏公會齊侯伐萊注傳例曰不與謀也萊國今東萊黃

縣音義

萊音來不與音預

秋公至自伐萊注無傳

大旱注無傳書旱而不書雩雩無功或不雩

冬公會晉侯宋公衛侯鄭伯曹伯于黑壤音義

壤如大反

傳七年春衛孫桓子來盟始通且謀會晉也注公即

位衛始脩好音義

好呼報反

夏公會齊侯伐萊不與謀也

凡師出與謀曰及不與謀曰會注與謀者謂同志之

國相與講議利害計成而行之故以相連及為文若不獲已應命而出則以外合為文皆據魯而言師者

國之大事存亡之所由故詳其舉動以例別之音義

不與音預下及注與謀同年末不與疏正義曰釋例

故此應應對之應別彼列反下注同疏曰與謀者同

志之國彼我之計未定相與共謀講議利害計成而

後行之故以相連及為文不與謀而出師者謂不得

已而應命故以外合為文皆據魯而言之也公親會

齊侯伐萊而傳以師出示例所以通卿大夫帥師者

也魯既春會于曹以謀伐鄭夏遂起師而更從不與

謀之文者厲公篡大子忽之位謀而納之非正故諱

不與謀之例若夫盟主之令則上行乎下非匹敵和

成之類故雖或先謀皆從不與謀之例成八年晉士

突來聘且言將伐郟下云會伐郟是也凡乞師者深
求過理之辭執謙以徇成其計故雖小國乞之於大
國大國乞之於小國亦皆從不與謀之例臧宣叔卻
錡是也傳以師出為例是唯繫於戰伐而劉賈許穎
濫以經諸及字為義本不在例今欲強合之所以多
相錯亂也杜言小乞大大乞小者僖二十六年公子
遂如楚乞師成二年臧宣叔如晉乞師是小國乞於
大國也成十三年卻錡來乞師十六年欒黶來乞師
十七年荀偃來乞師十八年士魴來乞師是大國乞
於小國也與謀者心俱欲伐彼此同謀乞師者非彼
所欲乞來為己也我乞彼者彼不與我謀彼乞我者
我不與彼謀是故凡言乞者皆從不與謀之例宣叔
是小乞大卻錡是大乞小除晉乞魯以外更無大乞
小者故舉卻錡以辨乞小之事耳晉是盟主自是上
行手下例無與謀之文不由

○赤狄侵晉取向陰之

禾注此無秋字蓋闕文晉用桓子謀故縱狄音義向舒

亮正義曰苗秀乃名為禾夏則無禾可反疏取知此取必在秋此無秋字蓋闕文○鄭及晉

平公子宋之謀也故相鄭伯以會冬盟于黑壤王叔

桓公臨之以謀不睦注王叔桓公周卿士銜天子之

命以監臨諸侯不同敵者尊卑之別也音義相息亮反敵所

洽反又所甲反監古銜反○晉侯之立也注在二年公不朝焉又

不使大夫聘晉人止公于會盟于黃父公不與盟以

賂免注黃父即黑壤故黑壤之盟不書諱之也注慢

盟主以取執止之辱故諱之疏

正義曰昭十三年公會劉子晉侯云于平

丘八月甲戌同盟于平丘公不與盟於時晉以讒慝弘多不與公盟公不得與非國之耻故書其同盟而顯言不與此時公實有罪為晉所執不得與盟是公之耻故諱而不書其盟若言諸侯實不盟公無所可然與

經八年春公至自會注無傳義與五年書過同疏

正義曰被

執不以為耻而亦告廟飲至故書之以示過也故杜云義與五年書過同

夏六月公子遂如齊至黃乃復注無傳蓋有疾而還大

夫受命而出雖死以尸將事遂以疾還非禮也疏

正義曰下

言其卒故疑有疾而還也聘禮曰賓入竟而死遂也若
賓死未將命則既斂于棺造于朝介將命哀十五年傳
曰有朝聘而終以尸將事之禮是入所聘之
竟則當遂行黃是齊竟遂以疾還非禮也

辛巳有事于大廟仲遂卒于垂注有事祭也仲遂卒與

祭同日略書有事為繹張本不言公子因上行還間無

異事省文從可知也稱字時君所嘉無義例也垂齊地

非魯竟故書地音義

大音泰傳同為于偽疏正義曰有反省所景反竟音境疏正義曰有

謂禘祭也釋例以昭十五年有事于武宮傳稱禘于武
公則知此言有事亦是禘也祭之日仲遂卒不言禘而
略言有事者禘事得常不主書禘為下繹祭張本耳上
言公子遂如齊此言仲遂卒不言公子者此書有事為

仲遂卒而書之與上相連猶是一事因上行遂間無異
事省公子之文從可知也衛氏難杜云其間有辛已有
事于大廟何得為間無異事秦氏釋云有事于大廟是
為仲遂卒起文只是一事故云間無異事也既不稱公
子而稱仲遂者時君所嘉寵故稱其字非義例也定五
年傳季平子行東野卒于房房是魯地卒于竟內故不
書其地垂是齊地
非魯竟故書地也

壬午猶繹萬入去籥注繹又祭陳昨日之禮所以賓尸

萬舞名籥管也猶者可止之辭魯人知卿佐之喪不宜

作樂而不知廢繹故內舞去籥惡其聲聞音義去起呂反注及

傳同籥羊略反管音館惡疏正義曰繹又祭釋祭文孫
烏路反聲聞音問又如字炎云祭之明日尋繹復祭

也公羊傳曰繹者何祭之明日也穀梁傳云繹者祭之
旦日之享賓也天子諸侯謂之為繹少牢饋食大夫之
禮也謂之賓尸釋詁云繹陳也是陳昨日之禮以賓敬
此尸也公羊傳曰萬者何千舞也籥者何籥舞也其言
萬人去籥何去其有聲者不廢其無聲者知其不可而
為之也猶者何通可以已也是萬為舞名禮明堂位曰
朱干玉戚冕而舞大武干楯也戚斧也此舞者左手執
楯右手執斧故謂之武舞言王者以萬人服天下故以
萬為名詩言碩人之舞云左手執籥右手秉翟鄭玄云
籥如管六孔何休云吹之以節舞也故吹籥而舞謂之
文舞魯人知卿佐之喪不宜作樂故去其有聲而不知
廢繹納舞去籥惡其聲聞也尋杜注意直云萬舞名又
注隱五年亦直云萬舞也下問羽數則萬是舞之大名
不取公羊萬是千舞之義則執羽吹籥是為萬舞故杜
云納舞去籥惡其聲聞是無千舞籥舞之別名也沈氏
云案曾子問嘗禘郊社簋簠既陳天子崩后之喪廢則

卿喪不廢正祭繹是又祭為輕故當廢之

戊子夫人嬴氏薨注無傳宣公母也

晉師白狄伐秦

楚人滅舒蓼

秋七月甲子日有食之既注無傳月三十日食

冬十月己丑葬我小君敬嬴注敬謚嬴姓也反哭成喪

故稱葬小君疏正義曰謚法夙夜敬事曰敬

雨不克葬庚寅日中而克葬注克成也疏正義曰定十五年九月丁

已葬我君定公而不克葬戊午日下曷乃克葬彼云乃此云而者公羊傳曰而者何難也乃者何難也曷為或言而或言乃乃難乎而也何休云難者臣子重難不得以正日葬其君言乃者內而深言而者外而淺下曷日朕久故言乃左氏無傳杜又不說或如公羊之言或是史家異辭

城平陽注今泰山有平陽縣

楚師伐陳

傳八年春白狄及晉平夏會晉伐秦注經在仲遂卒

下從赴晉人獲秦謀殺諸絳市六日而蘇注蓋記異

也音義

謀徒協反間也今謂之細作絳古巷反

○有事于太廟襄仲卒

而繹非禮也○楚為衆舒叛故伐舒蓼滅之注舒蓼

二國名音義

偽為于反疏正義曰舒蓼二國名者蓋轉寫誤當云一國名案釋例土地名

南舒羣舒舒蓼舒庸舒鳩以為五名則與文五年滅蓼同蓋蓼滅後更復故楚今更滅之劉炫以杜為一國而規之非也楚子疆之注正其界也音義疆居反及滑汭注

滑水名音義

滑于八反汭如蛻反一音如悅反

盟吳越而還注吳國

今吳郡越國今會稽山陰縣也傳言楚疆吳越服從

音義

會古外反稽古反疆其良反疏正義曰譜云吳姬姓周大王

雍讓其弟季歷而去之荆蠻自號句吳句或為工夷言發聲也大伯無子而卒仲雍嗣之當武王克殷而

因封其曾孫周章於吳為吳子又別封章弟虞仲於
虞自大伯五世而得封十二世而晉滅虞虞滅而吳
始大至壽夢而稱王壽夢以上世數可知而不紀其
年壽夢元年魯成公之六年也夫差十五年獲麟之
歲也二十三年魯哀公之二十二年而越滅吳越奴
姓其先夏后少康之庶子也封於會稽自號於越於
者夷言發聲也濱在南海不與中國通後二十餘世
至於允常魯定公五年始伐吳允常卒子句踐立是
為越王越王元年魯定公之十四年也魯哀公二十
二年句踐滅吳霸中國春秋後七世大為楚所破
遂微弱矣外傳曰芊姓歸越是越
本楚之別封也或非夏后之後也

○晉胥克有蠱疾

注惑以喪志音義

蠱音古喪
息浪反

卻缺為政注代趙盾秋

廢胥克使趙朔佐下軍注朔盾之子代胥克為成十

七年胥童怨邵氏張本○冬葬敬嬴旱無麻始用葛

第注記禮變之所由第所以引柩殯則有之以備火

葬則以下柩音義

第方勿反引棺索也柩其又反

疏

正義曰禮記諸言自某始者皆

與後人為始此云始用葛第則自此以後常用葛故云記禮變之所由第字禮或作弟或作縶繩之別名也周禮遂人大表屬六紼天子用六也喪大記君葬用四紼大夫士葬用二紼是紼者所以引柩也於殯則已有之繫於輜車以備火災有災則引柩以辟火及葬則用之以下柩也

雨不克葬禮

也禮卜葬先遠日辟不懷也注懷思也疏

正義曰曲禮云凡卜

筮日旬之外曰遠某日旬之內曰近某日喪事先遠日吉事先近日鄭玄云喪事葬與練祥也吉事祭祀

冠娶之屬也然則先近日先卜上旬不吉卜次旬又不吉卜下旬喪事則先卜下旬卜葬先卜遠日辟不思念其親似欲汲汲而早葬之也今若冒雨而葬亦是不思其親欲得早葬故舉卜葬先遠日以證為雨而止禮也王制云庶人葬不為雨止者鄭玄云雖雨猶葬禮儀少也

○城平陽書時也

○陳及晉平楚師伐陳取成而還注言晉楚爭強

經九年春王正月公如齊注無傳公至自齊注無傳

夏仲孫蔑如京師

齊侯伐萊注無傳

秋取根牟注根牟東夷國也今琅邪陽都縣東有牟鄉

八月滕子卒注未同盟

九月晉侯宋公衛侯鄭伯曹伯會于扈

晉荀林父帥師伐陳

辛酉晉侯黑臀卒于扈注卒於竟外故書地四與文同

盟九月無辛酉日誤音義

竟音境

疏

正義曰釋例扈是鄭地故云卒於竟外黑

臀以二年始立而云四與文同盟

者杜注春秋又為釋

例前後經傳勘當備盡宜晉侯二年始立不于文公之

世而云四與文同盟必是後寫之誤蘇氏亦以為然劉

炫以此規杜非也其君卒或書地或不書地皆從赴今

云卒於竟外故書地者晉侯實在竟外卒非以為例也

劉炫云襄七年鄭伯髡頑卒于鄆昭二十五年宋公佐

卒于曲棘竟內亦書地非竟外九月無辛酉者下有十月癸酉杜以長歷推之癸酉是十月十六日辛酉在前十二日耳故云九月無辛酉上有八月下有十月非月誤也

冬十月癸酉衛侯鄭卒注無傳三與文同盟疏

正義曰鄭父燬

以僖二十五年卒鄭代立其年盟于洮二十六年于向二十八年于踐土文七年于扈十四年于新城唯二與文同盟云三者以二三字體相近轉寫之誤耳若其不然杜無容不委劉炫以此規杜非也

宋人圍滕

楚子伐鄭

晉卻缺帥師救鄭

陳殺其大夫洩冶注洩冶直諫於淫亂之朝以取死故

不為春秋所貴而書名音義

洩息列反治音也

疏

正義曰文八年宋人殺其

大夫司馬貴之而不名此書洩冶之名是不為春秋所貴故書名傳稱臣者所以治煩去惑是以伏死而爭則直諫者臣之盡忠之事洩冶忠諫而死不為春秋所貴者釋例曰魯哀之可諫者甚衆未聞仲尼之苦言至於陳恒弑其君孔子沐浴而朝告於哀公求討不義顯事施舍足以致益者固人臣之所當造膝也若乃情色之惑君不能得之於臣父不能得之於子臣子而欲顯直於其君父適所以益謗而致罪也陳靈公宣淫悖德亂倫志同禽獸非盡言所救洩冶進無匡濟遠策退不危行言孫安昏亂之朝慕匹夫之直志蘧氏可卷之德死而無益故經同罪賤之文傳特稱仲尼以明之忠為令德非其人猶不可況不令乎此其義也是說不貴洩冶

之意也然則比干諫紂而死孔子稱殷有三仁焉善比
干者家語云子貢曰陳靈公君臣宣淫於朝洩治諫而
殺之是與比干諫死同可謂仁乎孔子曰比干於紂親
則諸父官則少師忠款之心在於存宗廟而已固當以
必死爭之冀身死之後紂常悔悟本志存於仁者也洩
治之於靈公位在大夫無骨肉之親懷寵不去仕於亂
朝以區區之身欲止一國之淫昏死而無益可謂狷矣
詩云民之多辟無自立辟其洩治之謂乎是洩治之行
不得同於比干之意也

傳九年春王使來徵聘注徵召也言周微也徵聘不

書微加諷諭不指斥音義

諷芳風反

夏孟獻子聘於周王

以為有禮厚賄之音義

賄呼罪反
字林音悔

○秋取根牟言易

也音義

易以鼓反

○滕昭公卒注為宋圍滕傳○會于扈

討不睦也注謀齊陳陳侯不會注前年與楚成故晉

荀林父以諸侯之師伐陳注不書諸侯師林父帥之

無將師音義

將子匠反

疏

正義曰僖二十八年晉侯齊師宋師秦師及楚人戰

于城濮彼註云宋公齊國歸父秦小子慙既次城濮以師屬晉不與戰也彼以師屬晉而經書其師此全不書者彼雖公卿不行仍存大夫帥之將卑師衆故稱師耳此則全無將帥以兵付晉并入晉軍林父獨自帥之故唯書

林父伐陳也

晉侯卒于扈乃還○冬宋人圍滕因

其喪也○陳靈公與孔寧儀行父通於夏姬皆衷其

相服以戲于朝注二子陳卿夏姬鄭穆公女陳大夫

御叔妻衷懷也相服近身衣音義

夏戶雅反衷音忠王下仲反相女乙

反一音汝栗反說文云日日所衣裳也字林同又云婦人近身內衣也仁一反御如字一音魚呂反近附

近之近

洩冶諫曰公卿宣淫民無効焉注宣示也音義

効戶教反

且聞不令君其納之注納藏相服音義

聞如字一音問

公曰吾能改矣公告二子二子請殺之公弗禁遂殺

洩冶孔子曰詩云民之多辟無自立辟其洩冶之謂

乎注辟邪也辟法也詩大雅言邪辟之世不可立法

國無道危行言孫音義

禁居鵠反又音金多辟本又作僻匹亦反注同立辟婢亦

反注同邪似嗟反下

同行下孟反孫音遜

○楚子為厲之後故伐鄭注六

年楚伐鄭取成於厲既成鄭伯逃歸事見十一年音

義

為于偽反見賢遍反

○晉卻缺救鄭鄭伯敗楚師于柳焚注

柳焚鄭地音義

柳力手反焚扶云反

國人皆喜唯子良憂曰是

國之災也吾死無日矣注自是晉楚交兵伐鄭十二

年卒有楚子入鄭之禍

經十年春公如齊公至自齊注無傳

齊人歸我濟西田注元年以賂齊也不言來公如齊因

受之音義

濟子禮反

夏四月丙辰日有食之注無傳不書朔官失之

已巳齊侯元卒注未同盟而赴以名

齊崔氏出奔衛注齊略見舉族出因其告辭以見無罪

音義

見賢遍反下同

疏

正義曰崔杼有寵於惠公惠公既薨高國二家恐其藉前世之寵又有寵於新

君故畏其偏已因君薨而逐之崔杼未有罪也齊人疑其事故不言其名略言崔氏見其舉族出奔耳及仲尼脩之大夫出奔無罪不名不名即是無罪故因告稱氏而書氏以見無罪若貴之或稱官或稱字如司城子哀

之類
是也

公如齊五月公至自齊注無傳

癸巳陳夏徵舒弑其君平國注徵舒陳大夫也靈公惡

不加民故稱臣以弑音義

夏戶
推反

六月宋師伐滕

公孫歸父如齊葬齊惠公注無傳歸父襄仲之子

晉人宋人衛人曹人伐鄭注鄭及楚平故

秋天王使王季子來聘注王季子者公羊以為天王之

母弟然則字季子天子大夫稱字疏

正義曰公羊傳曰王季子者何天子

之大夫也其稱王季子何貴也其貴奈何母弟也是公羊以為天王之母弟也母弟而稱季子然則字季子也天子大夫例稱字襄三十年天王殺其弟佞夫母弟稱弟此不言王弟者釋例云朝聘盟會嘉好之事此兄弟之篤睦非義例之所興故仍舊史之策或稱弟或稱公子是由義無所見故因其舊文其相殺害乃稱弟以示耳

公孫歸父帥師伐邾取繹注繹邾邑魯國鄒縣北有繹

山音義

釋音

疏

正義曰文十三年傳稱邾遷于繹則繹為邾之都矣更別有繹邑今魯伐取之

非取邾之都也亦因繹山為名蓋近在邾都之旁耳

大水注無傳

季孫行父如齊

冬公孫歸父如齊齊侯使國佐來聘注既葬成君故稱君命使也

饑注無傳有水災嘉穀不成

楚子伐鄭

傳十年春公如齊齊侯以我服故歸濟西之田注公比年朝齊故○夏齊惠公卒崔杼有寵于惠公高國

畏其偏也注高國二家齊正卿音義

杼直呂反
偏彼力反

公卒

而逐之奔衛書曰崔氏非其罪也且告以族不以名

注典策之法告者皆當書以名今齊特以族告夫子

因而存之以示無罪又言且告以族不以名者明春

秋有因而用之不皆改舊史疏

正義曰傳言且告以族不以名知法當以

名告而齊人誤以族告也釋例云乃若稱司城以貴
效節於府人書歸父之還以善復命於介因齊人告
辭以著其無罪蓋隨事以示褒貶也傳既云書曰崔
氏以明非罪復云且告以族不以名知典策之書舊
當以名通也齊國雖繆以族告適合仲尼新褒之實
因而不革以示無罪且明春秋之作或因仍舊史成

文不必皆有改也何休膏肓以為公羊譏世卿而難左氏蘇氏釋云崔杼祖父名不見經則知非世卿且春秋之時諸侯擅相征伐猶尚不譏世卿雖曰非禮夫子何由獨責又鄭駁異義引尚書世選爾勞又引詩刺幽王絕功臣之世然則興滅繼絕王者之常識世卿之文其義何在

凡諸侯之大夫

違注違奔放也疏

正義曰釋例曰迫窘而奔及以禮見放俱去其國故傳通以違為文

是言違兼奔放也

告于諸侯曰某氏之守臣某注上某氏者

姓下某名音義

又反

疏

正義曰若言崔氏之守臣杼也大夫受氏當世守宗廟故

謂之守臣言守宗廟之臣也僖十二年管仲云天子之二守高國在彼謂天子命之為守國之臣與此異也知此異於彼者蓋天子命者出奔乃得告於諸侯餘臣出奔不得告也且下句云失守宗廟知守臣謂

守宗廟之臣非守國也天子賜姓諸侯賜族對父則
姓與族別散文則可以通禮謂族人為庶姓故云上
某氏者姓其實正是族也失守宗廟敢告所有玉帛之使者則告

注玉帛之使謂聘音義

之使所吏反

疏

正義曰聘禮執玉致命執帛致享故

云玉帛之使謂聘也下註云思好不接故亦不告又
昭二十年曹公孫會自鄆出奔宋注云嘗有玉帛之
使來告故書則杜意以為奔者之身嘗有玉帛之使
於彼國已經相接則告之若奔者未嘗往聘思好不
接則不告唯告奔者嘗聘之國餘不告也劉炫以為
玉帛之使謂國家有交好之國皆告非指奔者之一

身

不然則否注思好不接故亦不告音義

好呼報反

○公

如齊奔喪注公親奔喪非禮也公出朝會奔喪會葬

皆書如不言其事史之常也○陳靈公與孔寧儀行

父飲酒于夏氏公謂行父曰徵舒似女對曰亦似君

徵舒病之注靈公即位於今十五年徵舒已為卿年

大無嫌是公子蓋以夏姬淫放故謂其子多似以為

戲音義

夏戶雅反
女音汝

公出自其廐射而殺之二子奔楚

音義

廐居又反
射食亦反

○滕人恃晉而不事宋六月宋師伐

滕○鄭及楚平注前年敗楚師恐楚深怨故與之平

諸侯之師伐鄭取成而還○秋劉康公來報聘注報

孟獻子之聘即王季子也其後食采於劉○師伐邾

取繹注為子家如齊傳○季文子初聘于齊注齊侯

初即位○冬子家如齊伐邾故也注魯侵小恐為齊

所討故往謝國武子來報聘注報文子也○楚子伐

鄭晉士會救鄭逐楚師于潁北注潁水出河南陽城

至下蔡入淮疏

正義曰釋例曰潁水出河南陽城縣陽乾山東南經潁川汝陰至淮南下

蔡縣入淮也

諸侯之師戍鄭鄭子家卒鄭人討幽公之亂

斲子家之棺而逐其族注以四年弑君故也斲薄其

棺不使從卿禮

音義

斷竹角反

疏

正義曰喪大記云君大棺八寸屬六寸

上大夫大棺八寸屬六寸下大夫大棺六寸屬四寸

士棺六寸然則子家上大夫棺當八寸今斷薄其棺

不使從卿禮耳不知

改葬幽公諡之曰靈疏

正義曰諡法動

斷薄之使從何禮也

靜亂常

曰幽

經十有一年春王正月

夏楚子陳侯鄭伯盟于辰陵注楚復伐鄭故受盟也辰

陵陳地潁川長平縣東南有辰亭音義

復扶又反下復封陳同

公孫歸父會齊人伐莒注無傳

秋晉侯會狄于欒函注晉侯往會之故以狄為會主欒

函狄地音義

欒才端反 正義曰凡諸侯聚會魯不與

疏

者皆歷序諸國云會于某地

上盟于辰陵即其事也狄從諸夏序例亦然僖二十年齊人狄人盟于邢是也此異於彼而云晉侯會狄是狄在彼地晉往會之故傳說晉大夫欲召狄卻成子勸其勤是晉侯自往故以狄為會主成十五年會吳子鍾離襄十年會吳于祖其意與此同

冬十月楚人殺陳夏徵舒注不言楚子而稱人討賊辭

也疏

正義曰討賊辭者言弑君之賊人人皆欲殺之作舉國共殺之文故不言楚子也襄二十七年衛殺

其大夫甯喜亦是討賊但衛人自殺其臣故稱大夫徵舒非楚之臣不得言殺其大夫諸放殺及執他國之臣

皆不言某國大夫者以人臣卑
賤故沒其爵疏而空書名氏

丁亥楚子入陳注楚子先殺微舒而欲縣陳後得申叔

時諫乃復封陳不有其地故書入在殺微舒之後疏

正義

曰案傳楚子為陳討夏氏亂遂入陳殺夏微舒輟諸粟
門此經先書殺夏微舒後書入陳者據先後事實為文
故杜注云楚子先殺微舒而欲縣陳後得申叔時諫乃
復封陳不有其地故書入陳在殺微舒之後是其事也
劉炫云楚子入陳乃殺微舒經先書殺微舒後言入陳
者以楚子本意止欲討賊無心滅陳及殺微舒滅陳為
縣後得申叔時諫乃復封陳於例不有其地故云入陳
言楚人既殺微舒楚子乃復入陳納二子於陳入陳之
文為下納張本傳言書曰入陳納公孫寧儀行父于陳
書有禮也入納連文是入為納也昭八年楚師滅陳執

公子招放子越殺陳孔矣彼心欲滅陳此則主為討賊
無心滅陳而復封之君子善其自悔故退入陳於下隱
其縣陳之過若其不然當云楚子入陳殺夏徵舒如此
則楚子本為入陳因入方討陳賊則是惡楚子故書入
在殺徵舒之後

納公孫寧儀行父于陳注二子淫昏亂人也君弑之後

能外託楚以求報君之讎內結強援於國故楚莊得平
步而討陳除弑君之賊於時陳成公播蕩於晉定亡君

之嗣靈公成喪賊討國復功足以補過故君子善楚復

之音義

播補賀反蕩如字

疏

正義曰二子與君淫昏致使君死國亂實罪人也今楚子入陳而納

之乃是納罪人也。例應罪楚子而傳言書曰入陳納公孫寧儀行父于陳。書有禮也。既善楚子有禮則是恕彼之過。故杜述其合恕之由。言賊討國復是二子之力。其功足以補過。故君子善楚復之。賈逵云二子不繫之陳絕於陳也。惡其與君淫。故絕之。善楚有禮也。案子糾捷。皆不繫國。自是例之。常賈說非也。釋例云賈氏依放殺梁云。稱納者內難之辭。納公孫寧儀行父于陳。言書有禮不可言內難也。陳縣而見復上下交驩。二人雖有淫縱之闕。今道楚匡陳賊討君葬威權方盛。傳稱其禮理無所難。此先儒說之不安也。杜言於時陳成公播蕩。於晉者此傳云陳侯在晉襄二十五年。傳云夏氏之亂。成公播蕩是也。

傳十一年春楚子伐鄭及櫟子良曰晉楚不務德而兵爭與其來者可也晉楚無信我焉得有信乃從楚

夏楚盟于辰陵陳鄭服也注傳言楚與晉狎主盟音

義

標力狄反爭爭鬪之爭馬於
虔反夏楚盟本或作楚子

○楚左尹子重侵宋

注子重公子嬰齊莊王弟王待諸郢注郢楚地音義

郢音
延

○令尹爲艾獵城沂注艾獵孫叔敖也沂楚邑

音義

艾五蓋反獵力
劣反沂魚依反疏正義曰服虔亦云艾獵爲賈

爲艾獵明年云令尹孫叔敖明一人也世
本艾獵爲叔敖之兄世本多誤本必不然

使封人慮

事注封人其時主築城者慮事謀慮計功音義

慮如
字一

音力於反廣雅
云無慮都邑也

疏

正義曰周禮封人凡封國封其四
疆造都邑之封域者亦如之大司

馬大役與慮事受其要以待考而賞誅鄭玄云慮事者封人也於有役司馬與之屬賦丈尺與其用人數也是封人主造城邑計度人數此云使封人故云其時主築城者慮事者謀慮城築之事無則慮之訖則計功也史書多有無慮之語皆謂揆度前事也

以授司徒注司徒掌役量功命日注命作日數分財用注財用築用具平板榦注

榦榦也音義

榦古旦反亦疏正義曰釋詁云榦榦榦作榦榦音貞也舍人曰榦正也築牆

所立兩木也榦所以當牆兩邊郭土者也彼榦為榦故為榦為榦謂牆之兩頭立木也板在兩旁即郭土者即彼文榦也平板榦者等其高下使城齊也稱畚築注量輕重畚盛土器

音義

畚音本盛音成

程土物注為作程限音義

為于偽反又如字

疏

正義曰畚者盛土之器築者築土之杵司馬法輦車
所載二築是也稱畚築者量其輕重均負土與築者
之力也程土物謂鍤鍤畚
舉之屬為作程限備豫也議遠邇注均勞逸略基趾

注趾城足略行也音義

趾音止行下孟反

具餽糧注餽乾食

也音義

餽音侯糧音良乾食如字一音嗣本或作乾飯

度有司注謀監主音

義

度待洛反監古銜反

事三旬而成注十日為旬不愆于素注

不過素所慮之期也傳言叔敖之能使民音義

愆起虔反

○晉卻成子求成于眾狄眾狄疾赤狄之役遂服于

晉注赤狄潞氏最強故服役眾狄音義

潞音路

秋會于

攢函衆狄服也是行也諸大夫欲召狄卻成子曰吾

聞之非德莫如勤非勤何以求人能勤有繼其從之

也注勤則功繼之詩曰文王既勤止注詩頌文王勤

以創業音義

創初亮反

文王猶勤况寡德乎○冬楚子為

陳夏氏亂故伐陳注十年夏徵舒弑君音義

為于偽反

謂

陳人無動將討於少西氏注少西徵舒之祖子夏之

名音義

少詩照反

疏

正義曰禮以王父字為氏徵舒以夏為氏知子夏是字少西是名言少西

氏者氏猶家也言

將討少西之家

遂入陳殺夏徵舒轅諸栗門注轅

車裂也栗門陳城門音義

輟音忠

因縣陳注滅陳以為

楚縣陳侯在晉注靈公子成公午申叔時使于齊反

復命而退王使讓之曰夏徵舒為不道殺其君寡人

以諸侯討而戮之疏

正義曰經無諸侯而云以諸侯討之諸侯皆慶者時有楚之屬

國從行也十二年郊之戰經不書唐而傳云唐侯為左拒昭十七年長岸之戰經不書隨而傳言使隨人

守舟明此時亦有諸侯但為楚私屬不以告耳

諸侯縣公皆慶寡人注楚縣

大夫皆僭稱公音義

使所吏反僭子念反

女獨不慶寡人何故

對曰猶可辭乎王曰可哉曰夏徵舒弑其君其罪大

矣討而戮之君之義也抑人亦有言曰牽牛以蹊人

之田注抑辭也蹊徑也音義

女音汝蹊音兮徑古定反

而奪之牛

牽牛以蹊者信有罪矣而奪之牛罰已重矣諸侯之

從也曰討有罪也今縣陳貪其富也以討召諸侯而

以貪歸之無乃不可乎王曰善哉吾未之聞也反之

可乎曰吾儕小人所謂取諸其懷而與之也注叔時

謙言小人意淺謂譬如取人物於其懷而還之為愈

於不還音義

儕仕皆反輩也

乃復封陳鄉取一人焉以歸謂

之夏州注州鄉屬示討夏氏所獲也音義

復扶又反夏戶雅反

疏

正義曰謂之夏州者討夏氏鄉取一人以歸楚而成一州故謂之夏州

故書曰楚子

入陳納公孫寧儀行父于陳書有禮也注沒其縣陳

本意全以討亂存國為文善其得禮疏

正義曰言入陳納人為有

禮也直言入陳納人是沒其縣陳本意言陳國見存入而納此人耳是全以討亂存國為文所以善其得

禮

○厲之役鄭伯逃歸注蓋在六年自是楚未得志

焉鄭既受盟于辰陵又徼事于晉注為明年楚圍鄭

傳十年鄭及楚平既無其事辰陵盟後鄭徼事晉又

無端跡傳皆特發以明經也自厲之役鄭南北兩屬故未得志九年楚子伐鄭不以黑壤興伐遠稱厲之役者志恨在厲役此皆傳上下相包通之義也音義

徵古疏正義曰十年鄭及楚平既無其事謂經無之堯反疏也鄭徵事晉又無端跡亦謂經所無也傳若不發此語不知楚以何故明年忽然圍鄭為此特發此傳以明後年圍鄭之經也自厲役以來鄭南北兩屬不專心於楚故楚未得志而明年圍之七年晉為黑壤之會鄭伯在馬厲役在黑壤之前九年傳言楚子為厲之役故伐鄭事在黑壤之後而彼傳不以黑壤興伐而遠稱厲之役者楚子之志所恨在於厲役逃歸不為黑壤會晉故也上指厲下指辰陵中包黑壤此皆傳上下相包通之義也

春秋左傳注疏卷二十二

春秋左傳注疏卷二十二考證

齊高固來逆叔姬○

臣召南

按公穀經文叔姬上有子

字又按穀梁傳曰諸侯之嫁子於大夫主大夫以與之來者接內也不正其接內故不與夫婦之稱也杜注不書女歸降於諸侯蓋用其說

傳楚人伐鄭注九年十一年傳所稱厲之役蓋在此○

趙汭補注曰楚比年伐鄭惟此年傳記取成而還故杜氏以厲之役在此傳蓋有闕

臣召南

按九年傳曰

楚子為厲之役故伐鄭杜注六年楚伐鄭取成于厲
既成鄭伯逃歸十一年傳曰厲之役鄭伯逃歸自是
楚未得志焉杜注蓋在六年傳所稱楚人伐鄭取成
而還也此傳既曰取成而還鄭伯又何至于逃歸乎
杜注前後皆言蓋蓋者疑辭也

衛侯使孫良夫來盟疏文二年晉人以公不朝一段○
監本誤刻於公會齊侯伐萊注下今改正

傳故黑壤之盟不書諱之也○趙汭補注曰說者多以

沙隨平邱不諱駁此傳為妄今知不妄者宣公恃齊而不事晉於是見止而以賂免其恥在內故諱之臣

浩按傳既曰不書諱之則舊史已無其文非孔子始為隱諱也

壬午猶繹萬入去籥疏去其有聲者不廢其無聲者○
監本脫不字今添

傳楚為衆舒叛故伐舒蓼滅之注舒蓼二國名疏當云
一國名○趙汭補注曰經傳記舒庸舒鳩皆冠以舒

故釋例知此舒蓼亦是其類孔疏謂注言二國為轉
寫誤也得之文五年傳記楚子變滅蓼不冠以舒者
別是蓼國皐陶之後亦如文十六年滅庸與舒庸無
與也孔氏併文五年所滅之蓼與此年舒蓼為一則
又誤矣

又疏土地名有舒羣舒舒蓼舒庸舒鳩以為五名○

臣召南

按文十二年傳羣舒叛楚正義引世本云舒

庸舒蓼舒鳩舒龍舒鮑舒龔則是有六舒矣此云五

舒當是不數舒龔也此疏舒羣舒羣字誤應作舒龍

舒鮑各本俱誤耳

臣照

按疏云劉炫以杜為一國而

規之非也一國當是二國孔氏意謂杜本作一國傳
寫之誤乃作二劉以杜為二國而規之不知杜本作
一也若作一國便不可解

傳盟吳越而還注傳言楚彊吳越服從○

臣浩

按吳越

二國始見于傳吳之服楚始于此其抗楚亦基于此
陳殺其大夫洩冶注洩冶直諫於淫亂之朝以取死故

不為春秋所貴而書名○萬斯大曰古今持論最不平者莫如以直諫罪洩冶冶無罪也殺之者之罪也經書殺洩冶繼書陳夏徵舒弑其君繼書楚子入陳以著為君不道而殺諫臣必至身弑國亡為後鑒也又疏臣之盡忠之事○事監本訛作爭今改正

傳王以為有禮厚賄之○賄監本訛作賂今改正

傳孔子曰詩云一段○陳洙曰此非聖人之言孔子稱三仁曰比干諫而死反罪洩冶乎趙汭補注曰傳以

稱國殺大夫為有罪故雖無罪見殺者必求其罪以實之杜氏遂以書名為貶非但不知經旨亦未究史法

臣召南

謂洩冶不見幾早去猶可謂直諫為非忠

必不可

臣照

按傳稱孔子曰詩云民之多辟無自立

辟其洩冶之謂乎蓋哀之也非譏之也玩詩語可知且以孔父例之安知洩冶之冶仇牧之牧為非字乎

傳楚子為厲之役故伐鄭注六年楚伐鄭取成於厲既成鄭伯逃歸事見十一年○

臣浩

按監本訛作六年

伐楚鄭取成於厲既成鄭伯逃歸事見十二年今以別本改正

傳崔杼有寵于惠公高國畏其偪也○趙汭補注曰自此至崔杼弑君凡五十一年惠公之世杼應尚幼成十七年傳言齊侯使崔杼為大夫明前此未仕故此年傳說者不取今以告以族之說推之崔氏出自丁公杼之祖若父必有嘗為卿者至杼雖未為卿其寵已足以偪高國此高國之所忌也故因惠公卒舉族

出之杼未為卿故不書名實卿族也故來告書其族
春秋辭從主人而世卿之失自見公羊譏世卿之說
不為無所本也萬斯大曰豐氏謂氏天二字篆文相
近蓋崔天也按僖二十八年城濮之戰左傳有齊崔
天至是凡三十四年其人宜尚存可備參考

納公孫寧儀行父于陳注功足以補過故君子善楚復
之○臣召南按復封陳者楚莊之有禮納二子者楚

莊之失刑但以能復陳國則大善當褒未暇及細過

耳二子陷君於惡致國幾亡行同禽獸有何功足以
補過乎杜注迂矣

春秋左傳注疏卷二十二 考證

欽定四庫全書薈要卷一千一百三十九

經部

春秋左傳注疏卷二十三

起宣公十二年
盡十二年

晉杜氏注 唐陸德明音義 孔穎達疏

經十有二年春葬陳靈公注無傳賊討國復二十一月

然後得葬

楚子圍鄭注前年盟辰陵而又微事晉故音義

微古
堯反

夏六月乙卯晉荀林父帥師及楚子戰于邲晉師敗績

注晉上軍成陳故書戰邲鄭地音義

邲扶必反一音
弼陳音直覲反

疏

正義曰此一軍成陳兩軍不成陳成陳者雖少以戰為文案昭二十三年鷄父之戰六國成陳而楚不成陳成陳者多而以敗為文者六國雖衆楚為兵主楚既未陳故以獨敗為文與此異也

秋七月

冬十有二月戊寅楚子滅蕭注蕭宋附庸國十二月無

戊寅戊寅十一月九日疏

正義曰莊十二年宋萬弑閔公蕭叔大心者宋蕭邑之大

夫也平宋亂立桓公宋人嘉之以蕭邑封叔為附庸莊二十三年蕭叔朝公是其事也此年楚子滅蕭定十一年宋公之弟辰入于蕭以叛則此後復為宋邑也杜以長歷校之十二月無戊寅乃是十一月九日此不言月誤長歷云日月必有誤者案傳稱師人多寒若是十一月則今之九月未是寒時當月是而日誤也

晉人宋人衛人曹人同盟于清丘注晉衛背盟故大夫

稱人宋華椒承羣偽之言以誤其國宋雖有守信之善

而椒猶不免譏清丘衛地今在濮陽縣東南音義

背蒲對反

下注疏正義曰傳云盟曰恤病討貳陳貳於楚而宋伐

同

之衛救陳不討貳也楚伐宋而晉衛不救不恤

病也是晉衛背盟故貶其大夫而稱人曹是小國貶與

不貶俱當稱人故不言曹也明年傳稱君子曰清丘之

盟唯宋可以免則宋不違盟而亦貶宋卿者彼晉衛曹

並皆偽妄華椒承羣偽之言以誤其國致使宋為盟故

伐陳衛人救之楚人討之伐陳怒楚被伐無救宋雖有

守信之善而椒猶不免譏者為諸國失信而累及椒也

晉衛不信乃在盟後非是心欲不信而妄作此盟當盟

之時未有不信之狀在後違約不可豫知而亦并責椒

者君子結交當擇善而從之所與不善必將貳德椒與不信約盟則是不信之黨雖獨守信并亦貶之戒後之人使擇交也

宋師伐陳衛人救陳注背清丘之盟

傳十二年春楚子圍鄭旬有七日鄭人卜行成不吉

卜臨于大宮注臨哭也大宮鄭祖廟音義

臨力鶴反下注同大

宮音泰

疏正義曰案雜記客致舍賄訖請臨襄十二年傳吳子壽夢卒臨于周廟故云臨哭也

注同

宮即廟也象其尊貌則謂之為廟言其墻屋則稱之為宮大宮宮之大者鄭祖廟者謂鄭大祖之廟也

且巷出車吉注出車於巷示將見遷不得安居國人

大臨守陴者皆哭注陴城上僻俛皆哭所以告楚窮

也音義

陴婢支反徐扶移反僻普計反俛五計反疏正義曰陴城上小牆

六年晏弱圍萊堙之環城傅於堞注云堞女牆也又二十五年吳子門于巢巢牛臣隱於短牆以射之二十七年盧蒲嫫攻崔氏崔氏堞其宮而守之注云堞短垣也陴堞僻俛短牆短垣女牆皆一物也說文云堞城上女垣也廣雅云陴俛女牆也釋名云城上垣曰陴於其孔中俛俛非常亦言陴益也助城之高也或曰女牆言其卑小比之於城如女子之於丈夫也楚子退師鄭人脩城進復

圍之三月克之注哀其窮哭故為退師而猶不服故

復圍之九十日音義

復扶又反注同故為于偽反

疏

正義曰杜以三月克之謂

圍經三月方始克之故云九十日也知非季春克之者下云六月晉師救鄭及河聞鄭既及楚平桓子欲還是將欲至河鄭猶未敗至河聞敗猶欲還師在國聞敗師必不發若是季春克之不應比至六月而晉人不聞以此知三月非季春也經傳皆言春圍鄭不知圍以何月為始圍經旬有七日為之退師聞其修城乃復更進圍三月方始克之則從初以至於克凡經一百二十許日蓋以三月始圍至六月乃克也

入自皇門至于逵路注塗方九軌曰逵音義

逵求龜反爾雅

云九達謂之逵說文作廐云九達道似龜背故謂之廐逵或廐字

鄭伯肉袒牽羊以

逆注肉袒牽羊示服為臣僕音義

祖徒旱反

曰孤不天注

不為天所祐音義

祐音又

不能事君使君懷怒以及敝

邑孤之罪也敢不唯命是聽其俘諸江南以實海濱
亦唯命其翦以賜諸侯使臣妾之亦唯命注翦削也

音義

得方夫反囚也濱音賓翦子淺反

若惠顧前好注楚鄭世有盟

誓之好音義

好呼報反注同

徼福於厲宣桓武不泯其社稷

注周厲王宣王鄭之所自出也鄭桓公武公始封之

賢君也願楚要福于此四君使社稷不滅泯猶滅也

音義

厲宣鄭桓公友周厲王之子宣王之母弟桓武鄭武公名滑寗桓公之子泯彌忍反徐亡軫反

要於疏正義曰鄭桓公是周厲王之子宣王母弟又
遙反宣王封之故僖二十四年及此皆厲宣並言

之桓公始封西鄭武公始居東鄭二公是始封之賢
君若其存鄭則四君祐楚故願楚要福於此四君使
社稷不滅混使改事君夷於九縣注楚滅九國以為
滅也釋詁文

縣願得比之音義

九縣莊六年滅鄧十四年滅息僖
五年滅弦十二年滅黃二十六年

滅夔文四年滅江五年滅六滅蓼十六年滅庸傳稱
楚武王克權使闔綰尹之又稱文王縣申息此十一
國不知何
以言九

疏

正義曰楚滅諸國見於傳者哀十七年
稱文王縣申息莊六年稱楚滅鄧十八

年稱武王克權僖五年滅弦十二年滅黃二十六年
滅夔文四年滅江五年滅六又滅蓼十六年滅庸凡
十一國見於傳僖二十八年傳曰漢陽諸姬楚實盡
之則楚之滅國多矣言九縣者申息定是其二餘不
知所謂蘇氏沈氏以權是小
國庸先屬楚自外為九也
君之惠也孤之願也非

所敢望也敢布腹心君實圖之左右曰不可許也得國無赦王曰其君能下人必能信用其民矣庸可幾乎退三十里而許之平注退一舍以禮鄭音義下避嫁反

幾音疏正義曰庸用也幾讀如冀言用冀可冀幸而得之乎何必滅其國潘阡入盟子

良出質注潘阡楚大夫子良鄭伯弟音義阡烏黃反質音致

○夏六月晉師救鄭荀林父將中軍注代卻缺音義

將子匠反下及注並同下尹將將左將右皆倣此先穀佐之注彘季代林父

音義穀戶木反本又作穀音同彘直例反疏正義曰服虔云食采於彘或當然也文十二年河曲

之戰荀林父佐中軍史駢佐上軍樂盾將下軍自爾
以來傳無其代知先穀代林父卻克代史駢趙朔代
樂盾也八年傳趙朔佐下軍知樂書代趙朔也案傳
文皆稱彘子今注云彘季者勘譜亦以彘子彘季為
一人則杜君別有所據書傳殘缺不可得而知也劉
炫云傳文皆稱彘子何以知是彘季以穀非彘季以
規杜今知非者杜以子為男子之稱季是幼小之辭
季之與子是得通稱子路或為季路舉其常稱謂之
子論其字謂之季故公子友或稱季友而

士會將上

劉以傳唯稱彘子無彘季而規杜非也

軍注河曲之役卻缺將上軍宣八年代趙盾為政將

中軍士會代將上軍卻克佐之注卻缺之子代史駢

音義

史滋朱反
駢蒲邊反

趙朔將下軍注代樂盾樂書佐之注

樂盾之子代趙朔趙括趙嬰齊為中軍大夫注括嬰

齊皆趙盾異母弟鞏朔趙穿為上軍大夫荀首趙同

為下軍大夫注荀首林父弟趙同趙嬰兄音義

鞏九勇反

韓厥為司馬注韓萬玄孫疏

正義曰韓世家云韓之先事晉得封韓原曰韓

武子後三世有韓厥世本云桓叔生子萬萬生求伯求伯生子與子與生獻子厥史記所云武子蓋韓萬也如彼二文厥是萬之曾孫而服虔杜預皆言厥韓萬玄孫不知何所據也

及河聞鄭既

及楚平桓子欲還曰無及於鄭而勦民焉用之注桓

子林父勦勞也音義

勦初交反徐又子小反焉於虔反

楚歸而動不

後注動兵伐鄭隨武子曰善注武子士會會聞用師

觀釁而動注釁罪也音義

釁許靳反服云間也

疏

正義曰釁訓為罪者釁是

間隙之名今人謂瓦裂龜裂皆為釁既有間隙故得為罪也

德刑政事典禮不易

不可敵也不為是征注言征伐為有罪不為有禮音

義

為于偽反注同

疏

正義曰既言觀釁而動更說無釁之事德行政事典禮此六事行之不變易者

不可與之敵也聖王之制征伐者為有罪者耳不為是六事不易行征伐也此舉六事之目下文歷說楚不易六事

楚君討鄭怒其貳而哀其卑叛而伐之服

以克之

而舍之德刑成矣伐叛刑也柔服德也二者立矣昔

歲入陳注討徵舒今茲入鄭民不罷勞君無怨讟注

讟謗也音義

罷音皮讟徒木反

疏

正義曰讟謗也政有常則民不恨故國君無人怨無

人謗擊鼓怨州吁鄭人謗子產是有怨謗也

政有經矣注經常也荆尸而

舉注荆楚也尸陳也楚武王始更為此陳法遂以為

名音義

此陳直觀反下同

商農工賈不敗其業而卒乘輯睦

注步曰卒車曰乘音義

賈音古卒子忽反注同乘繩證反注皆同輯音集又七八

反疏

正義曰齊語云公曰成民之事若何管子對曰四民者勿使雜處公曰處士工商農若何管子

對曰昔聖王之制也處士就閒燕處工就官府處商就市井處農就田野彼四民為士農工商此數亦四

無士而有賈者此武子意言舉兵動衆四者不敗其業發兵則以士從征不容復就閒燕故不云士而分商賈為二行曰商坐曰賈雖同是販賣而行坐異事業發兵征伐四者悉皆不與故摠云不助其業也

事

不奸矣注奸犯也音義

奸音干

為教為宰擇楚國之令

典注宰令尹為教孫叔敖音義

為于委反

疏

正義曰周禮六卿大宰為

長遂以宰為上卿之號楚臣令尹為長故從他國論之謂令尹為宰楚國仍別有大宰之官但位任卑耳傳稱大宰伯州犂是也楚國名上卿為令尹者釋詁云令善也釋言云尹正也言用善人正此官也楚官多以尹為名皆取其正直也

軍行右轅左追蓐注在車之右者挾

轅為戰備在左者追求草蓐為宿備傳曰令尹南轅

又曰改乘轅楚陳以轅為主音義

音辱挾胡牒反又古洽反一音古

協疏

正義曰司馬法兵車一乘有甲士三人步卒七

反十二人甲士在車不共卒役所言左右者分步卒為左右也兵車一轅服馬夾之而言挾轅者步卒被分在右者當軍行之時又分之使在兩廂挾轅以為戰備楚陳以轅為主故以轅表車正是挾車嚴兵以備不虞也其應在左者使之追求草蓐令雖道求草不近兵車也蓐謂卧上之草故云為宿備也此是在道時然故云軍行右轅左追蓐至於對陳之時則各在車之左右故豫定左右之分在道分使之耳

前茅慮無注慮無如今軍

行前有斥候踰伏皆持以絳及白為幡見騎賊舉絳幡見步賊舉白幡備慮有無也茅明也或曰時楚以

茅為旌識音義

踏徒臘反幡芳元反騎其寄反識申志反又音志

疏

正義曰茅明也

在前者明為思慮其所無之事恐其卒有非常當預告軍中兵衆使知而為之備也如今軍行謂當杜之時行軍有此法也前有斥候踰伏者令人遠在軍前斥度候望慮有伏兵使踰行之持以絳及白為幡與軍人為私號也曲禮曰前有水則載青旌前有塵埃則載鳴鳶前有車騎則載飛鴻前有士師則載虎皮前有摯獸則載貔貅其事與此見賊舉幡相似也茅明釋言文舍人曰茅昧之明也

中權後勁

注中軍制謀後以精兵為殿音義

勳吉政反殿丁練反

百官象

物而動軍政不戒而備注物猶類也戒勅令疏

正義曰類

謂旌旗畫物類也百官尊卑不同所建各有其物象其所建之物而行動軍之政教不待約勅號令而自

備辨也周禮大司馬中秋教治兵辨旗物之用王載
大常諸侯載旂軍吏載旗師都載旂鄉遂載物郊野
載旒百官載旗鄭玄云軍吏諸軍帥也師都遂大夫
也鄉遂鄉大夫也或載旂或載物衆屬軍吏無所將
也郊謂鄉遂之州長縣正以下野謂公邑大夫載旒
者以其將義卒也百官卿大夫也載旗者以其屬衛
王也凡旌旗有軍衆者畫異物無者帛而已是其尊
卑所建各有物類也案春官司常職云及國之大閱
贊司馬頒旗物王建大常諸侯建旂孤卿建旂大夫
士建物師都建旗州里建旗縣鄙建旒道車載旒旂
車建旌俱是周禮而所建不同者大司馬所云中秋
教治兵之法司常所云中冬教大閱之法鄭玄云凡
頒旗物以出軍之旗則如秋以尊卑之常建則如冬
大閱備軍禮旌旗不如出軍時空辟實也是為時不
同故所建異此云象物而動謂能用典矣其君之舉
軍行之時當指治兵之法也

也內姓選於親外姓選於舊注言親疎並用舉不失

德賞不失勞老有加惠注賜老則不計勞旅有施舍

注旅客來者施之以惠舍不勞役疏

正義曰內姓謂同姓也其君之

舉用人也於同姓則選之於親於外姓則選之於舊於親內選賢言唯賢是任不以親以舊便即用之所舉不失有德所賞不失有勞必有德乃舉有勞乃賞言不賞無勞不舉無德臣民年老有加贈恩惠外來旅客有施舍常法謂羈旅之臣以其新來施以恩惠舍不勞役也注正義曰老有恩惠當謂年老有加增恩惠不論有勞與無勞也劉炫云老者當有恩惠之賜非勞役之限但恩惠則賞賜之以文連賞不失勞之下故杜云賜老則不計勞劉炫以

不計勞之文而規杜氏一何煩碎

君子小人物有

服章注尊卑別也音義

別彼列反

貴有常尊賤有等威注

威儀有等差音義

差初佳反又初宜反

疏

正義曰言貴有常尊則當云賤有常卑而

云賤有等威者威儀等差又兼貴賤既屬禮不逆矣

德立刑行政成事時典從禮順若之何敵之疏

正義曰功

德若其不立刑威若其不行政以成就為上事以得時為善典貴其從禮惡其逆故云德立刑行政成事時典從禮順各以義理相配為文皆不易之事既歷序此事乃云若之何敵之覆上德刑政事典禮不易

不可敵也

見可而進知難而退軍之善政也兼弱攻昧武

之善經也注昧昏亂經法也音義

昧音妹

子姑整軍而

經武乎注姑且也猶有弱而昧者何必楚仲虺有言

曰取亂侮亡蕪弱也注仲虺湯左相薛之祖奚仲之

後音義

虺許鬼反侮亡呂反相息亮反

疏

正義曰取亂侮亡尚書仲虺之誥文也定元年傳薛

宰曰薛之皇祖奚仲居薛以為夏車正仲虺居薛以為湯左相二人皆是薛祖是仲虺為奚仲之後洵

曰於鑠王師導養時晦注洵詩頌篇名鑠美也言美

武王能遵天之道須暗昧者惡積而後取之音義

洵章

畧反於音烏

疏

正義曰洵詩經無洵字序云言能洵先祖之道以養天下故以洵為名焉

鑠舒若反

鑠美釋詁文於嘆辭也時是也晦昧也言於乎美哉武王之用師也能遵天之道養是闇昧之君待闇昧

者惡積而後取之言遵天之道者上天誅紂之期未至武王靜以待之是其遵天之道也者昧也

注者致也致討於昧音義

者音旨徐其夷反老也注及下同

疏

正義曰者

音旨旨致聲相近故為致也致討於昧者言養之使昧然後可討之上句云兼弱攻昧引仲虺之言以證兼弱引武王之事以證攻昧此不云攻昧而言者昧者以均詩之意言養紂而不言伐紂不得謂之攻昧故緣詩之意言致武曰無競惟烈注武詩頌篇名列之於昧然後攻之

業也言武王兼弱攻昧故成無疆之業音義

疆居良反

疏

正義曰烈業也釋詁文競疆也詩意言無疆乎唯武王之功業言克商功業實無疆也此引武詩承兼弱攻昧之下故杜以傳意解之言武王兼弱攻昧故成此無疆之業此詩均武二篇並無兼弱之事因傳上

文連言之

撫弱者昧以務烈所可也注言當務從武王之

功業撫而取之音義

以務烈所絕句

疏

正義曰上言兼弱此云撫弱言其撫養而

取之未必皆攻伐以求之也此撫弱即覆上仲虺有言兼弱也耆昧即覆上洵曰於鑠王師耆昧也以務烈所覆上武曰無競惟烈士會言不須敵楚兼撫餘諸侯弱者致討諸侯昧者以務武王烈業之所可也

彘子曰不可注彘子先穀晉所以霸師武臣力也今

失諸侯不可謂力有敵而不從不可謂武由我失霸

不如死且成師以出聞敵彊而退非夫也注非丈夫

命為軍帥而卒以非夫唯羣子能我弗為也以中軍

佐濟注佐彘子所帥也濟渡河音義

帥所類反下及注有帥元帥三

帥疏正義曰言晉之所以得為霸主者由軍師之武

同羣臣有力以有武力成此霸功今失諸侯不可

謂之為力見敵不能從不可謂之為武命為軍帥者

三軍將佐皆受君命為軍之主帥以中軍佐濟謂一

軍之內將佐分之各有所帥故注云佐彘子所知莊

子曰此師殆哉注莊子荀首音義

知音

周易有之在

師三三注坎下坤上師之臨三三注兌下坤上臨師

初六變而之臨疏

正義曰師坎為水坤為眾眾行如水師出之象故名其卦為師服虔

云坎為水坤為眾又互體震震為雷雷鼓類又為長子長子帥眾鳴鼓巡水而行行師之象也臨兌為澤

坤為地居地而附視於澤臨下之義故名為臨

曰師出以律否臧凶注此師

卦初六爻辭律法否不也音義

臧子郎反

執事順成為臧

逆為否注今彘子逆命不順成故應否臧之凶音義

應應對之應

衆散為弱注坎為衆今變為兌兌柔弱疏

正義

曰晉語文公筮尚有晉國司空季子占之曰震雷也車也坎水也衆也主雷與車而尚水與衆是坎為衆也易說卦兌為少女故為柔弱衆聚則彊散則弱坎變為兌是衆散為弱也

川壅為澤注

坎為川今變為兌兌為澤是川見壅音義

壅於勇反本又作雍

注皆疏

正義曰說卦坎為溝瀆溝瀆即是川也說卦兌為澤川是流水今變為澤是川見壅也

有律以如已也注如從也法行則人從法法敗則法

從人坎為法象今為衆則散為川則壅是失法之用

從人之象疏

正義曰釋詁云如往也往是相從之義故訓為從也法行則人從之率人以從

法也法敗則法從人人各有心乖法不用法從人也釋言云坎律銓也樊光曰坎卦水也水性平律亦平銓亦平也郭璞曰易坎卦主法法律皆所以銓量輕重是坎為法象也今坎變為兌為衆則散而為弱為川則壅而為澤是失法之故曰律否臧且律竭也注

竭敗也坎變為兌是法敗疏

正義曰竭是水涸之名坎為水為法水之竭似

法之敗故云竭敗也坎變為兌則為水不流則為法不行失為坎之用是法敗之象

盈而以竭

天且不整所以凶也注水遇天塞不得整流則竭涸

也音義

天於表反

疏

正義曰哀九年傳曰如川之滿不可游也水當盈川而以壅故竭是水遇

天塞不得整流則竭涸也天遇是壅塞之義故云遇天塞也

不行之謂臨注水變

為澤乃成臨卦釋不行之物有帥而不從臨孰甚焉

此之謂矣注譬彘子之違命亦不可行果遇必敗注

遇敵彘子尸之注主此禍疏

正義曰釋言訓尸為主故云主此禍也服虔亦

云此禍也又引易師卦六五長子帥師弟子與尸凶長子帥師以中行也弟子與尸使不當也佐之於元帥弟子也而專以師濟使不當也軍必破敗而與尸案下句云雖免而歸則謂彘子當在陳而免師卦有

與尸之語其言尸之或容有此意
但尸字不可兩解故杜畧去之

雖免而歸必有大

咎注為明年晉殺先穀傳音義

咎其疏正義曰莊子
九反見莊子逆命

必當有過乃論其事云此師之行甚危殆哉周易之
書而有此事師之初六變而為臨初六爻辭云軍師
之出當須以法若不善則致其凶既引易文以人從
律令者師出乃以律從人則有不臧之凶又覆解不
臧之義云執事上下相順和成則為臧若相違逆則
為不臧既釋不臧之事又釋以律之意坎為眾今變
為兌兌為柔弱是眾散為弱坎為川今變為兌兌為
澤是川壅為澤坎為法象今為眾則弱為川則壅是
法律破壞從人之象故曰律否臧以釋易文律否臧
之義否臧易注云為師之始齊師者也齊眾以律失
律則散故師出以律律不可失失律而臧何異於否
失令有功法所不赦故師出不以律否臧皆凶釋否

臧既了又釋凶之一字故云且律竭言法律竭盡也
川水當盈而以竭盡且又被天塞不得整流以法當
嚴整而以破壞被人違逆不得施行所以致此凶禍
解釋凶義既了以盡易意然後論彘子之惡當此初
六之禍故云水之不行是謂臨矣彘子有帥不從欲
論不行之臨事誰甚於彘子周易所言是彘子之謂
若能違辟前敵於事猶可若果敢遇敵必致禍敗也
此禍敗之事彘子主受之雖在敵免死而歸必大咎

也

韓獻子謂桓子注獻子韓厥曰彘子以偏師陷子

罪大矣子為元帥師不用命誰之罪也失屬亡師為
罪已重不如進也注今鄭屬楚故曰失屬彘子以偏

師陷故曰亡師音義

令力
呈反

事之不捷惡有所分注捷

成也與其專罪六人同之不猶愈乎注三軍皆敗則

六卿同罪不得獨責元帥師遂濟楚子北師次於邲

注邲鄭北地音義

邲音庭

沈尹將中軍注沈或作寢寢

縣也今汝陰固始縣音義

沈音審

疏

正義曰楚官多名為尹沈者或是邑

名而其字或作寢哀十八年有寢尹吳山于因解寢為縣名不言寢是而沈非也

子重將左

子反將右將飲馬於河而歸注子反公子側音義

飲於

鵠反聞晉師既濟王欲還嬖人伍參欲戰注參伍奢之

祖父音義

嬖必計反徐甫詣反字林方歧反參七南反

令尹孫叔敖弗欲

曰昔歲入陳今茲入鄭不無事矣戰而不捷參之肉
其足食乎參曰若事之捷孫叔為無謀矣不捷參之
肉將在晉軍可得食乎令尹南轅反旆注迴車南鄉

旆軍前大旗音義

旆蒲貝反鄉本又
作嚮同許亮反

伍參言於王曰

晉之從政者新未能行令其佐先穀剛愎不仁未肯

用命注愎狠也音義

愎皮逼反
狠胡壑反

其三帥者專行不獲

注欲專其所行而不得聽而無上衆誰適從注聽彘

子趙同趙括則為軍無上令衆不知所從音義

適丁
歷反

此行也晉師必敗且君而逃臣若社稷何王病之告

令尹改乘轅而北之次于管以待之疏

正義曰土地名滎陽京縣

東北有管城古管國也

晉師在敖部之間注滎陽京縣東北有

管城敖部二山在滎陽縣西北音義

乘繩證反管古緩反管城管叔

所封也本或作管古顏反非也放五刀反部苦交反

鄭皇成使如晉師曰鄭之

從楚社稷之故也未有貳心楚師驟勝而驕其師老

矣而不設備子擊之鄭師為承注承繼也音義

皇成雖律

反使所吏反驟仕救反

楚師必敗彘子曰敗楚服鄭於此在矣

必許之樂武子曰注武子樂書音義

敗必邁反

楚自克庸

以來注在文十六年其君無日不討國人而訓之注

討治也于民生之不易禍至之無日戒懼之不可以

怠注于曰也音義

易以政反

在軍無日不討軍實而申儆

之注軍實軍器音義

儆敬領反

于勝之不可保紂之百克

而卒無後訓之以若敖蚡冒筭路藍縷以啓山林注

若敖蚡冒皆楚之先君筭路柴車藍縷敝衣言此二

君勤儉以啓土音義

紂直九反蚡扶粉反冒莫報反筭音必藍力甘反縷力主反

疏

正義曰楚世家云熊罾卒子熊儀立是為若敖若敖卒子霄敖立霄敖卒子熊眇立是為蚡冒蚡冒

卒弟熊通立是為楚武王案杜注文十六年傳蚡冒

楚武王父不從史記也以荆竹織門謂之簾門則簾

路亦以荆竹編車故謂簾路為柴車方言云楚謂凡

人貧衣破醜敝為藍縷藍縷謂敝衣也服虔云言其

縷破藍

藍然

歲之曰民生在勤勤則不匱不可謂驕注歲

誠音義

歲章金反匱其位反

先大夫子犯有言曰師直為壯曲

為老我則不德而徼怨于楚我曲楚直不可謂老注

不德謂以力爭諸侯徼要也音義

要一反

其君之戎分

為二廣注君之親兵音義

廣古曠反下及注皆同

廣有一卒卒

偏之兩注十五乘為一廣司馬法百人為卒二十五

人為兩車十五乘為大偏今廣十五乘亦用舊偏法

復以二十五人為承副疏

正義曰兩廣之別各有一卒之兵百人也一卒之外

復有十五乘之偏并二十五人之兩既言一卒又云卒偏之兩言卒之者成辭婉句耳或解云兩屬於偏

云偏之兩者謂偏家之兩知不然者案成七年以兩之一卒亦云之字豈又是兩家之卒且杜注云十五

乘為大偏今楚亦用舊偏法此一廣之中實有此偏非是偏名為兩而出一卒別有偏之一兩二十五人

從之劉炫云兩廣之別各有一卒百人一卒外復有偏之一兩二十五人兵法十五乘為偏偏有一兩從

之兩是偏家之物故謂此為偏之兩其實一廣十五乘有一百二十五人從之注正義曰下云楚子為乘

廣三十乘分為左右知十五乘為一廣也史記稱齊景公時有司馬田穰苴善用兵至六國時齊威王使大夫追論古者司馬兵法附穰苴於其中凡一百五十篇號曰司馬法百人為卒二十五人為兩十五乘為偏皆司馬法之文百人為卒二十五人為兩周禮亦有此文但周禮無偏故杜并引司馬法耳此云大偏對成七年九乘為小偏故此為大偏也桓五年二十五乘為偏戰時臨陳所用不同不可與此相對為大小杜注多少皆望文也言亦用舊偏法者謂楚雖荆尸而舉仍用舊偏舊於穰苴前已有則應周禮有又但以亡沒者多故禮文不具

右廣初駕數及日中左則受之以至

于昏內官序當其夜注內官近官序次也音義

序當其夜

一本作序

疏

正義曰右廣鷄鳴初駕數及日中則左廣受而代之以至於昏此晝日事也其

內官親近主者為次序以當其夜若今宿直遞持更也

以待不虞不可謂無備

子良鄭之良也師叔楚之崇也注師叔潘阂為楚人

所崇貴師叔入盟子良在楚楚鄭親矣來勸我戰我

克則來不克遂往以我卜也鄭不可從疏

正義曰將我晉職之

勝負卜其遂來遂往猶人揲著看卦善惡而卜其去之與往也

趙括趙同曰率師以

來唯敵是求克敵得屬又何侯必從彘子注得屬服

鄭知季曰原屏咎之徒也注知季莊子也原趙同屏

趙括徒黨也音義

知季音智荀首後為智氏屏步丁反

趙莊子曰欒伯

善哉注莊子趙朔欒伯武子實其言必長晉國注實

猶充也言欒書之身行能克此言則當執晉國之政

也音義

長徐丁丈反
行下孟反

楚少宰如晉師注少宰官名音

義

少詩照反
注及下同

曰寡君少遭閔凶不能文注閔憂也聞

二先君之出入此行也注二先君楚成王穆王疏

正義

曰莊十六年楚始伐鄭文王之世也二十八年子元
伐鄭成王之初也僖五年首止之會鄭伯逃歸自是
以後鄭始時復從楚成王以前鄭未屬楚故出入此
行唯成穆耳今之莊王成王孫穆王子出入此行猶
往來
於鄭將鄭是訓定豈敢求罪于晉二三子無淹久注

淹留也隨季對曰昔平王命我先君文侯曰與鄭夾

輔周室毋廢王命今鄭不率注率遵也音義

夾古洽反舊古

協反母音無

寡君使羣臣問諸鄭豈敢辱候人注候人謂

伺候望敵者音義

候音戶豆反伺音司又音息嗣反

敢拜君命之辱

蕢子以為詔使趙括從而更之曰行人失辭注言誤

對音義

諂勅檢反

寡君使羣臣遷大國之迹於鄭注遷徙

也曰無辟敵羣臣無所逃命楚子又使求成于晉晉

人許之盟有日矣注有期日楚許伯御樂伯攝叔為

右以致晉師注單車挑戰又示不欲崇和以疑晉之

羣帥音義

單音丹挑徒了反下文同帥所類反疏正義曰周禮環人掌

其必戰之志則致師者致已欲戰之意於敵人故單車揚威武以挑之下云趙旃請挑戰是也挑彼晉師故言以致晉師也楚子既求成而又令挑戰示其不欲崇和以疑誤晉之羣帥許伯曰吾聞

致師者御靡旌摩壘而還注靡旌驅疾也摩近也音

義

摩末多反壘力軌反近附近之近

樂伯曰吾聞致師者左射以散

注左車左也散天之善者音義

射食亦反下注音同散側留反疏正義

曰兵車自非元帥皆射者在左御在中央故云左車左樂伯居左故稱左也下云莊子抽矢散納諸厨子

之房選好矢而留之
知蔽是矢之善者

代御執轡御下兩馬掉鞅而還

注兩飾也掉正也示閒暇音義

兩馬徐云或作柄皆力掌反或音亮掉徒

弔反徐乃較反鞅於丈反閒音閑

疏

正義曰兩飾掉正皆無明訓服虔亦云是相傳為然也飾馬者

謂隨宜刷刮馬又正其鞅以示閒暇

攝叔曰吾聞致師者右入壘折馘

注折馘斷耳音義

折之設反注同馘右獲反斷音短

執俘而還皆行

其所聞而復晉人逐之左右角之注張兩角從旁夾

攻之樂伯左射馬而右射人角不能進矢一而已麋

興於前射麋麗龜注麗著也龜背之隆高當心音義

麋亡悲反 疏

正義曰易雜卦象云離麗也日月離乎天百穀草木麗乎土是麗為著之義龜

之形背高而前後下此射麋麗龜謂著其高處故杜以龜為背之隆高當心者服虔亦是相傳為此說

也 晉鮑癸當其後使攝叔奉麋獻焉曰以歲之非時

獻禽之未至敢膳諸從者音義

從才用反 疏 正義曰 下從者同 周禮獸

人冬獻狼夏獻麋春秋獻獸物者謂獻之以共王之膳耳非能徧及於百官也禮冬獵曰狩言圍守而取之獲禽多也於時虞人所獻或頌及羣臣故言歲之非時獻獸之未至以為語之辭耳 鮑癸止

之曰其左善射其右有辭君子也既免注止不復逐

晉魏錡求公族未得注錡魏犢子欲為公族大夫音

義

錡魚綺反
犢尺周反

疏

正義曰服虔亦以為犢子世本以為犢孫世本多誤未必然也

而怒

欲敗晉師請致師弗許請使許之遂往請戰而還楚

潘黨逐之及熒澤見六麋射一麋以顧獻曰子有軍

事獸人無乃不給於鮮敢獻於從者注熒澤在熒陽

縣東新殺為鮮見六得一言其不如楚音義

敗必邁反又如

字使所吏反熒戶局反
射食亦反鮮音仙注同

叔黨命去之注叔黨潘黨潘

尢之子趙旃求卿未得注旃趙穿子且怒於失楚之

致師者請挑戰弗許請召盟許之與魏錡皆命而往

卻獻子曰二憾往矣注獻子卻克音義憾胡反弗備必

敗苑子曰鄭人勸戰弗敢從也楚人求成弗能好也

師無成命多備何為士季曰備之善若二子怒楚楚

人乘我喪師無日矣注乘猶登也音義好呼報反下同喪息浪反

不如備之楚之無惡除備而盟何損於好若以惡來

有備不敗且雖諸侯相見軍衛不徹警也注徹去也

音義警音景去起呂反苑子不可注不肯設備士季使鞏朔

韓穿帥七覆于敖前注帥將也覆為伏兵七處音義

覆扶又反注同帥如字
將子匠反處昌慮反

故上軍不敗趙嬰齊使其徒

先具舟于河故敗而先濟潘黨既逐魏錡注言魏錡

見逐而退趙旃夜至於楚軍注二人雖俱受命而行

不相隨趙旃在後至席於軍門之外使其徒入之注

布席坐示無所畏也疏

正義曰使已從人入壘以取俘馘也

楚子為乘

廣三十乘分為左右右廣雞鳴而駕日中而說注說

舍也音義

乘繩證反下三十乘十乘并注皆同說舒銳反注及下同

左則受之日

入而說許偃御右廣養由基為右彭名御左廣屈蕩

為右注楚王更迭載之故各有御右音義

屈居勿反更音庚迭

直結反

乙卯王乘左廣以逐趙旃趙旃棄車而走林屈

蕩搏之得其甲裳注下曰裳音義

搏音博

晉人懼二子

之怒楚師也使輶車迎之注輶車兵車名音義

輶徒溫反

疏

正義曰襄十一年鄭人賂晉侯以廣車輶車淳十五乘甲兵備甲兵從之是兵車明矣鄭玄云廣車

橫陳之車服虔云輶車屯守之車古名難得而知其義或當然矣

潘黨望其塵使騁

而告曰晉師至矣楚人亦懼王入晉軍也遂出陳

孫叔曰進之寧我薄人無人薄我詩云元戎十乘以

先啓行先人也注元戎戎車在前也詩小雅言王者

軍行必有戎車十乘在前開道先人為備音義

景勅反

陳直觀反下注皆同先

疏

正義曰元大也戎車也詩小雅六月之篇言王者軍

人悉薦反注及下同

行必有大車十乘常在軍前以開道諸軍從行所以

先人為備也詩毛傳云夏后氏曰鉤車先正也殷曰

寅車先疾也周曰元戎先良也三代行軍皆前有此

車其名司馬法之文也其先正先疾先良毛解其名

鄭玄又釋其意鉤車備設鉤輦其行曲直有正故曰

先正寅進也此車能進取遠道故曰先疾元戎大車

之善者故

軍志曰先人有奪人之心薄之也注奪敵

曰先良也

戰心遂疾進師車馳卒奔乘晉軍桓子不知所為鼓

於軍中曰先濟者有賞中軍下軍爭舟舟中之指可

掬也注兩手曰掬音義

卒子忽反下及注並同掬九六反

晉師右移

上軍未動注言餘軍皆移去唯上軍在經所以書戰

言猶有陳䟽

正義曰晉之三軍上軍在左中軍在中下軍在右言晉之中軍下軍敗走在上

軍之右者皆移唯上軍未動故杜云餘軍皆移去唯上軍在

工尹齊將右拒卒以

逐下軍注工尹齊楚大夫右拒陳名音義

拒音矩本亦作

矩下同

楚子使唐狡與蔡鳩居告唐惠侯注二子楚大

夫唐屬楚之小國義陽安昌縣東南有上唐鄉音義

狡古疏正義曰此未戰之前告經不書
卯反唐侯者為楚私屬故不見也

曰不穀不德

而貪以遇大敵不穀之罪也然楚不克君之羞也敢

藉君靈以濟楚師注藉猶假借也使潘黨率游闕四

十乘注游車補闕者音義

乘繩證反下之

疏

正義曰周禮車

僕有闕車之倖鄭玄云闕車所用補闕之車也此
言游闕知游車以擬補闕今使從唐侯是補闕也從

唐侯以為左拒以從上軍駒伯曰待諸乎注駒伯卻

克上軍佐也隨季曰楚師方壯若萃於我吾師必盡

注萃聚也音義

萃似

不如收而去之分謗生民不亦

可乎注同奔為分謗不戰為生民殿其卒而退不敗

注以其所將卒為軍後殿音義

殿多練反注同

王見右廣將

從之乘屈蕩戶之曰君以此始亦必以終注戶止軍

中易乘則恐軍人惑自是楚之乘廣先左注以乘左

得勝故疏

正義曰桓八年傳云楚人尚左君必左者謂置車尚左故君在左此言先左謂乘廣

先左耳上文且云右廣初駕日中乃授左廣則舊法先乘右廣今楚王偶然乘左車以逐趙旃因是而得戰勝以為宜乘左廣自是以後

晉人或以廣隊不能

進注廣兵車音義

隊直類反

注

正義曰襄十一年鄭人賂晉侯以廣車定四年史皇

以乘廣死是兵車稱廣也此言晉人廣隊下云拔旆
投衡軍行則旆在軍前不是車皆有旆也此蓋是晉
人在軍之前
載旆之車
楚人碁之脫局注碁教也局車上兵闌

音義

碁其器反局古熒反徐公冥反服云局橫木投
輪間一曰車前橫木也西京賦云旗不脫局薛

綜云局所

疏

正義曰脫局拔旆皆是教人之語知碁
為止旗也為教也服虔云局橫木有橫木投於輪

間一曰局車前橫木張衡西京賦云旗不脫局薛綜
注云局所以止旗今杜以局為車上兵闌各以意言
皆無明證而禮扛鼎之木其名曰局則局是橫木之
名教之脫局則局是可脫之物杜云兵闌蓋橫木車
前以約車上之兵器處其落也
隊坑則橫木有礙故不能進
少進馬還又碁之拔

旆投衡乃出注還便旋不進旆大旗也拔旗投衡上

使不帆風差輕音義

帆凡切反本又作把
普霸反差初資反

疏

正義曰
正義曰
旆扇風

重故馬便旋而不能進釋文云緇廣克幅長尋曰旆
繼旆曰旆郭璞云帛續旆末為燕尾者此旆能扇風
使重令馬不能進則其制必大矣故云旆大旗也城
濮之役亡大旆之左旆此之類也旆縣於竿挿之車
上衡是馬頸上橫木故拔取旗竿投於衡上仆之使
不帆風則於車差輕故得出坑也帆是扇風之名今
人舡上張布以

鄣風名之曰帆

顧曰吾不如大國之數奔也趙旆以

其良馬二濟其兄與叔父以他馬反遇敵不能去棄

車而走林逢大夫與其二子乘注逢氏音義

數所角
反乘繩

證謂其二子無顧注不欲見趙旆顧曰趙叟在後注

傻老稱也音義

傻素口反稱尺證反

怒之使下指木曰尸女於

是授趙旃綏以免明日以表尸之注表所指木取其

尸音義

女音汝

皆重獲在木下注兄弟累尸而死音義

重直疏

正義曰獲者被殺之名並皆被殺唯當言皆隴反獲耳欲見尸相重累之皆獲故杜辯之云兄

弟累尸而死累

即傳之重也

楚熊負羈囚知瑩知莊子以其族反

之注負羈楚大夫知瑩知莊子之子族家兵反還戰

音義

瑩於耕反還音環

廚武子御注武子魏錡音義

廚直誅反

下

軍之士多從之注知莊子下軍大夫故每射抽矢蔽

納諸廚子之房注抽擢也敢好箭房箭舍音義

射食夜反

人食亦反擢直角反

廚子怒曰非子之求而蒲之愛注蒲楊柳

可以為箭董澤之蒲可勝既乎注董澤澤名河東聞

喜縣東北有董池陂既盡也音義

勝音升陂彼宜反

疏

正義曰重

物不可舉者謂之不勝用之不可盡者亦言不勝史傳多有其事今人無復此語故少難解耳既盡也可

勝盡乎言用之不可盡也

知季曰不以人子吾子其可得乎吾不

可以苟射故也音義

射食亦反下同

疏

正義曰言我不以好箭射楚貴人之子而

質之吾之子其可得乎吾為此計者不可用惡箭苟且為射故也

射連尹襄老獲之

遂載其尸射公子穀臣囚之以二者還注穀臣楚王

子及昏楚師軍於邲晉之餘師不能軍注不能成營

也宵濟亦終夜有聲注言其兵衆將不能用音義

子將

反丙辰楚重至於邲注重輜重也音義

重直勇反又直用反注上

重字同輜側其反重也直用反疏

正義曰輜重載物之車也說文云輜一名駟前後蔽也蔽前後以載

物謂之輜車載物必重謂之重車人挽以行謂之輦輜重輦一物也襄十年傳稱秦董父輦重如役挽此

車也輜重載器物糧食常在軍後故乙卯日戰丙辰始至於邲也周禮鄉師大軍旅會同正治其徒役與

其輦輦鄭玄云輦駕馬輦人挽行所以載什器也止以為藩營司馬法云夏后氏謂輦曰余車殷曰胡奴

車周曰輜輦輦一芥一斤一鑿一裡一鋤周輦加二版二築又曰夏后氏二十人而輦殷十八人而輦周十五人而輦說者以為夏出師不踰時殷踰時周歷時故前世輦少而後世輦多

遂次于衡

雍潘黨曰君盍築武軍注築軍營以章武功音義

於雍

用反盍戶臘反

而收晉尸以為京觀注積尸封土其上謂之

京觀音義

觀古亂反注及下京觀同

臣聞克敵必示子孫以無忘

武功楚子曰非爾所知也夫文止戈為武注文字武

王克商作頌曰載戢干戈載橐弓矢注戢藏也橐韜

也詩美武王能誅滅暴亂而息兵音義

戢側立反橐古刀反韜他

反刀我求懿德肆于時夏允王保之注肆遂也夏大也

言武王既息兵又能求美德故遂大而信王保天下

音義

夏戶雅反注同

疏

正義曰昔武王克商周公為之作頌曰武王誅紂之後則載藏其干戈則

橐韜其弓矢言既誅暴亂則無復所用故韜藏之懿美也肆遂也時是也夏大也允信也武王以天下既定又能求美德之士而任用之故於是功業遂大信哉唯我武王保之美武王能保天下也注正義曰戢訓為斂聚斂藏之義故為藏也橐一名韜盛弓矢之衣也干戈弓矢藏而不復用是美武王能誅滅暴亂而息兵也此所引者周頌時邁之篇也詩序云頌者以其成功告於神明則頌詩功成乃作此傳言武王克商作頌者武王克商後世追為作頌頌其克商之功非克商即作也國語引此云周文公之頌曰則此

周公所作也傳言克商作頌者包下三篇皆述武王之事肆之為遂相傳為此訓也夏大釋詁文求美德謂求而任用之遂又作武其卒章曰耆定爾功注武大者功業遂大也

頌篇名耆致也言武王誅紂致定其功音義

耆音旨注同

疏

正義曰既作時邁又作武篇也頌皆一章言其卒章者謂終章之句也言武王誅紂致定爾武之大

功也其三曰鋪時繹思我徂維求定注其三三篇鋪布

也繹陳也時是也思辭也頌美武王能布政陳教使

天下歸往求安定音義

鋪普吳反徐音敷繹音亦

疏正義曰其三

也鋪布也繹陳也徂往也言武王能布陳政教故其時之民歸武王者皆云我徂惟自求安定美武王能

安民故民歸之也注正義曰鋪是布散之義故為布也繹陳釋詁文思是語之辭不為義也

其六

曰綏萬邦屢豐年注其六六篇綏安也屢數也言武

王既安天下數致豐年此三六之數與今詩頌篇次

不同蓋楚樂歌之次第音義

屢力注反注同數所角反疏正義曰

頌桓之篇也綏安也屢數也言武王伐紂安天下萬國數有豐熟之年美武王能和衆國豐民財也注正義曰綏安釋詁文屢數常訓也杜以其三其六與今詩頌篇次不同故為疑辭蓋楚樂歌之第言楚之樂人歌周頌者別為次第故齊第三桓第六也劉炫以為其三其六者是楚子第三引鋪時繹思第六引綏萬邦今刪定知非者此傳若是舊文及傳家叙事容可言楚子第三引鋪時繹思第六引綏萬邦此既引

楚子之言明知先有三六之語故楚子引之得云其三其六若楚子始第三引詩第六引詩豈得自言其三曰其六曰劉以其三其六為楚子引詩次第以規杜過何辟之甚沈氏難云襄二十九年季札觀樂篇次不同杜云仲尼未刪定此亦不同而云楚樂歌之次者襄二十九年雖少有篇次不同大畧不甚乖越故云仲尼未刪定以前此之三十六全與詩次不同故云楚樂歌之第今頌篇次桓第八賚第九也

夫

武禁暴戢兵保大定功安民和衆豐財者也注此武

七德疏

正義曰楚子既引四篇乃陳七德則四篇之內有此七者之義戢干戈橐弓矢禁暴戢兵

也時夏保之保大也者定爾功定功也我徂求定安民也綏萬邦和衆也屢豐年豐財也我徂求定是能安民故往求定也綏萬國故使子孫無忘其章注著由德能和衆故萬國安也

之篇章使子孫不忘疏

正義曰杜以不忘其章謂子孫不忘上四篇之詩故云著

之篇章使子孫不忘必知然者以文承武王克商作頌之後文連四篇詩義故以為著之篇章劉炫云能有七德故子孫不忘章明功業橫取下文京觀為無忘其章明武功以規杜過非也今我使二

國暴骨暴矣觀兵以威諸侯兵不戢矣暴而不戢安

能保大猶有晉在焉得定功所違民欲猶多民何安

焉無德而強爭諸侯何以和衆利人之幾注幾危也

音義

暴骨滿卜反本或作曝馬得於虔反強其丈反

而安人之亂以為已榮

何以豐財注兵動則年荒武有七德我無一焉何以

示子孫其為先君宮告成事而已注祀先君告戰勝

疏

正義曰禮記曾子問稱古者師行必以遷廟主行載於齊車言必有尊也尚書甘誓云用命賞于祖

謂遷廟之祖主也為先君宮為此遷主作宮於此祀之告成事告戰勝也禮記大傳云牧之野武王之大事也既事而奠於牧室亦是新作室而奠祭也曾子問又曰無遷主則何主孔子曰天子諸侯將出必以幣帛皮圭告於祖禰遂奉以出載於齊車以行每舍奠焉而後就舍武非吾功也古者

明王伐不敬取其鯨鯢而封之以為大戮於是乎有

京觀以懲淫慝注鯨鯢大魚名以喻不義之人吞食

小國音義

鯨其京反鯢五兮反懲直升反慝他得反疏正義曰裴淵廣州

雄曰鯨雖曰鯢目即明月珠也故死即不見眼睛也周處風土記云鯨鯢海中大魚也俗說出入穴即為

潮今罪無所注晉罪無所犯也而民皆盡忠以死君

命又何以為京觀乎祀于河作先君宮告成事而還

注傳言楚莊有禮所以遂興是役也鄭石制實入楚

師將以分鄭而立公子魚臣疏

正義曰入楚師言入此楚師於鄭國服虔

云入楚師使楚師來入鄭是也此石制引楚師入鄭將以分鄭國以半與楚取半立公子魚臣為鄭君已

欲擅其寵也

辛未鄭殺僕叔及子服注僕叔魚臣也子服

石制也君子曰史佚所謂毋怙亂者謂是類也注言

恃人之亂以要利音義

佚音逸母音無怙音戶要一遙反

詩曰亂離

瘼矣爰其適歸注詩小雅離憂也瘼病也爰於也言

禍亂憂病於何所歸乎歎之音義

瘼音莫

疏

正義曰詩小雅四月

之篇也離憂瘼病爰於皆釋詁文言時世禍亂必有憂病者於何其所適歸乎歎此禍亂不知將何所歸

也歸於怙亂者也夫注恃亂則禍歸之音義

扶夫音

○

鄭伯許男如楚注為十四年晉伐鄭傳○秋晉師歸

桓子請死疏

正義曰檀弓云謀人之軍師敗則死之謀人之邦邑危則亡之今桓子將軍師

敗故請死晉侯欲許之士貞子諫曰不可注貞子士渥濁

音義

渥於角反

城濮之役晉師三日穀注在僖二十八年

音義

渥音卜

文公猶有憂色左右曰有喜而憂如有憂

而喜乎注言憂喜失時公曰得臣猶在憂未歇也注

歇盡也音義

歇許竭反

困獸猶鬪況國相乎及楚殺子玉

注子玉得臣音義

相息亮反下能相同

公喜而後可知也注喜

見於顏色音義

見賢遍反

曰莫余毒也已晉再克而楚

再敗也楚是以再世不競注成王至穆王音義

競其敬反

今天或者大警晉也注警戒也而又殺林父以重楚

勝其無乃久不競乎林父之事君也進思盡忠退思

補過疏

正義曰孝經有此二句孔安國云進見於君則必竭其忠貞之節以圖國事直道正辭有

犯無隱退還所職思其事宜獻可替否以補主過此孔意進謂見君退謂還私職也或當以此二句據臣心為文文既據臣君在其上施之於君則稱進內省其身則稱退盡忠者盡已之心以進獻於君補過者內修已心以補君愆失故以盡忠為進補過為退耳非謂進見與退還也

社稷之衛也若

之何殺之夫其敗也如日月之食焉何損於明晉侯

使復其位注言晉景所以不失霸音義

重直用反

○冬楚

子伐蕭宋華椒以蔡人救蕭蕭人囚熊相宜僚及公

子丙王曰勿殺吾退蕭人殺之王怒遂圍蕭蕭潰疏

正義曰實未潰史以實王之意故言潰知者下云明日蕭潰是也

申公巫臣曰師人

多寒王巡三軍拊而勉之注拊撫慰勉之音義

僚子彫反

潰戶內反拊芳甫反

三軍之士皆如挾纊注纊綿也言說以忘

寒音義

挾戶牒反纊音曠說音悅

疏

正義曰玉藻云纊為繭緇為袍鄭玄云纊新絲也

遂

傳於蕭還無社與司馬卯言號申叔展注還無社蕭

大夫司馬卯申叔展皆楚大夫也無社素識叔展故

因卯呼之音義

傳音附還音旋卯馬鮑反號除戶到反一音戶刀反呼也

叔展曰

有麥麴乎曰無有山鞠窮乎曰無注麥麴鞠窮所以

禦濕欲使無社逃泥水中無社不解故曰無軍中不

敢正言故謬語音義

麴去六反鞠起弓反禦魚呂反下同解音蟹下同

疏

正義

曰麥麴鞠窮所以禦濕賈逵有此言則相傳為此說也尚書說命云若作酒醴爾惟麴藥則麥麴作酒之物本草有芎窮者是藥草之名觀傳文勢欲使無社逃於泥水中而問有此物以否知是禦濕所用但不知若為用之耳

河魚腹疾奈何注叔展言無禦濕藥將病曰

目於智井而拯之注無社意解欲入井故使叔展視

虛廢井而求拯已出溺為拯音義

智烏丸反智井廢井也字林云井無

水也一皮反拯
拯救之拯注同

疏

正義曰上句是叔展之言曰下是
無社對語無社頻答言無叔展乃

言必須入井故以水厄告之云如似河中之魚久在
水內則生腹疾無此二物其奈濕何無社乃解其意
告叔展云當日視晉井而
拯出之出溺為拯方言文

若為茅經哭井則已注叔

展又欲結茅以表井須哭乃應以為信音義

經直結
反已音

紀舊音以應
應對之應

疏

正義曰此亦叔展之言也無社既解
其意令展視井拯已但廢井必多不

可知處故教無社令結茅為經置於井上又恐無社
錯應他人更教之云若號哭向井則是我之已身已

展叔自
謂也

明日蕭潰申叔視其井則茅經存焉號而出

之注號哭也傳言蕭人無守心音義

號戶刀反注
同守手又反

○

晉原穀宋華椒衛孔達曹人同盟于清丘注原穀先

穀疏

正義曰杜譜以為雜人則不知誰之子也案傳先軫或稱原軫此蓋先軫之後也傳有名號之

異杜譜皆竝言之先穀之下不言原穀是杜脫也上文稱其薨子服虔以為食采於薨今復稱原原其上世所食也於時趙氏有原同蓋分原邑而共食之也曰恤病討貳於是卿不書

不實其言也注宋伐陳衛救之不討貳也楚伐宋晉

不救不恤病也宋為盟故伐陳注陳貳於楚故音義

為于衛人救之孔達曰先君有約言焉若大國討我

偽反

則死之注衛成公與陳共公有舊好故孔達欲背盟

救陳而以死謝晉為十四年衛殺孔達傳音義

約於
妙反

又如字共公音恭好呼報
反背音佩十四年經注同

春秋左傳注疏卷二十三

春秋左氏傳注疏卷二十三考證

傳卜臨于大宮注大宮鄭祖廟○

臣召南

按大宮即太

廟鄭自桓公始封則桓公廟也襄二十五年傳齊盟
國人于大宮注太宮廟亦始封之君也又按傳云鄭
祖厲王則當時僭禮諸侯亦祖天子所謂周廟者厲
王廟也昭十八年子產使祝史徙主祔於周廟注曰
厲王廟是也

傳徵福於厲宣桓武注周厲王宣王鄭之所自出也○

臣台南

按鄭桓公厲王之子宣王始封於鄭以宣為鄭所自出注稍未檢當云厲王鄭之所自出宣王鄭之所自封也

傳使改事君夷於九縣音義○監本顛倒訛謬今俱改正

傳荀林父將中軍注代卻缺○

臣浩

按趙盾卒後卻缺

為政見八年傳十一年傳稱卻成子求成于眾狄眾狄皆服于晉則林父之代卻缺即在本年故伍參曰

晉之從政者新未能行令也

傳郤克佐之注郤缺之子○監本訛作郤克之子今改正

傳洵曰於鑠王師遵養時晦疏洵詩經無洵字序云言能洵先祖之道以養天下故以洵為名焉○臣召南

按文義應作詩經無洵字序云言能酌先祖之道以養天下故以酌為名

傳知莊子曰此師殆哉下○監本有疏莊子見藐子逆

命一段按其文義宜在雖免而歸必有大咎注下又有師坎為水至故名為臨一段按其文義宜在周易有之在師之臨注下今俱改正

傳沈尹將中軍○

臣照

按楚官莫尊於令尹或疑沈尹

將中軍則令尹孫叔敖何所將乎沈尹當作孫尹竊謂其時楚王在軍則中軍楚王所自將也王自將無與左軍右軍旗鼓一例之理則以沈尹為之將猶後世丞相府以長史主文書丞相不與六卿敵也孫叔

教楚相當運籌帷幄之中亦不得將中軍故沈尹實將之

傳晉師在教郛之間注教郛二山在滎陽縣西北○

臣

召南

按後漢書郡國志河南尹滎陽有教亭注周宣

王狩於教左傳晉師在教郛之間秦立為教倉

傳歲之曰民生在勤○王應麟曰生如生於憂患之生

故公父文伯之母曰民勞則思思則善心生

傳代御執轡御下兩馬掉鞅而還○

臣召南

按周禮環

人注引春秋傳作捫馬

又音義徐云或作柄○疑當云或作柄偏傍從手不從木

傳使輓車迎之疏廣車橫陳之車○陳監本訛作車今改正

傳晉師右移上軍未動○趙汭補注曰據傳上軍雖未動下言殿其卒而退是亦未嘗出陳也

臣台南

按上

軍未動即上文所謂士季使鞏朔韓穿帥七覆於敖

前故上軍不敗也

傳王見右廣將從之乘屈蕩戶之○

臣浩

按注戶訓為

止諸本多有作屈蕩尸之誤也今改正

傳宵濟亦終夜有聲○顧炎武曰知錄曰杜注言其兵
衆將不能用非也言其軍囂無復部伍

傳晉原穀疏先軫或稱原軫此蓋先軫之後也○

臣召

南按史記晉世家穀先軫子也以傳考之軫子先居

且居且子先克文九年為箕鄭等所殺則此先穀當

是軫之孫或曾孫史記未可信也疏云蓋先軫之後
可謂慎審矣

春秋左氏傳注疏卷二十三考證

謹按卷二十二第三頁後七行疏乃奠菜鄭四字
刊本監本毛本訛作然後祭行四字據宋本改

正

第十頁前六行疏又注隱五年刊本又訛以今改
第十五頁後二行注謀齊陳諸本陳訛也據宋本
改

第十八頁前七行疏今魯伐取之刊本伐訛仍今
改

卷二十三第一頁前四行注二十一月刊本訛二
十二月今改

第六頁後七行傳楚君討鄭諸本君訛軍據宋本
改


第八頁前五行疏為宿備也刊本備訛衛今改
第九頁前五行疏道車載櫜刊本櫜訛櫜今改
第十八頁前二行疏十五乘為偏諸本乘訛卒據

宋本改

第二十九頁後七行疏別為次第刊本為訛無今
改

第三十一頁前一行注祀先君刊本祀訛禮今改





覆校官檢討臣季學錦

校對官修撰臣張書勳

校對官編修臣張秉愚

謄錄監生臣張虎文

謄錄監生臣閻學澄